

PM
991
Z77R6m
1871
SOA


31
2

W T Van Doren

Tullahoma

Aug 24. 1876 -

N.S.R.



991
27726m
1871
SVA

MVSKOKE

NAKOKV ESKERRETV ESVHOKKOLAT.

CREEK

SECOND READER.

REV. W. S. ROBERTSON.
REV. DAVID WINSLETT



PUBLISHED BY THE
AMERICAN TRACT SOCIETY,
150 NASSAU-STREET, NEW YORK.

LIBRARY

1870

1870

1870

1870

1870

1870

1870

1870

1870

1870

1870

1870

1870

1870

ESHECETV,


MOMEN TOHTVLHUECVLKE E HOCEFKV.

Eten Cypofuce	-----Rev. John Fleming's Books	5
Eknv Ohonkv	-----Rev. John Fleming's Books	7
Oketv Ohonkv	-----Rev. John Fleming's Books	9
Etempohetv	-----Grace Leeds	10
Tvkoca	-----David Hodge	12
Afveke haketv	-----Josiah Perryman	13
Holwvke opunvyetv	-----Josiah Perryman	14
Este feke holwakat	-----Sandford Perryman	15
Fvcevn punahoyvks	-----Josiah Perryman	16
Fo	-----Robert Lasley	17
Lvkevt lvkevpe hayet omes	-----Rev. D. Winslett	19
Naorketv lopucke sahsekos	-----David Hodge	20
Naorketv	-----Josiah Perryman	21
Holwvyeckv momen estemerkv	-----David Hodge	22
Cehofv hoporrenet	-----David Hodge	24
Nokuse	-----Josiah Perryman	26
Hesaketvmese-em-este, momen yvmv		
ekvny esten	-----David Hodge	28
Hesaketvmese em este vcacakat	-----David Hodge	30
Tewe mekko	-----Josiah Perryman	31
Este hoporreneko nake makvte	-----Rev. D. Winslett	33
Pu hesayecv	-----Legus Perryman	36
Este-papv	-----D. Winslett	38
Rvtce-kuphe	-----Josiah Perryman	40
Fuswv tafv-herv	-----Rev. J. M. Perryman	41
Uekatev	-----Rev. David Winslett	43
Naorketv enkvvketv		46
Cetto	-----David Hodge	47
Hackv	-----Thomas Perryman	49

Hotvle	<i>Charles Barnett</i>	50
Ke-rakko em vpe	<i>Rev. David Winslett</i>	51
Nettv espoke	<i>Lewis Perryman</i>	52
Hesaketvmese estomis hvmeecicet omes		55
Hoporrenkv punvkv	<i>Thomas Perryman</i>	56
Satkv	<i>Thomas Perryman</i>	57
Erke eppucetakeu	<i>David Hodge</i>	58
Hoktuce enokkat	<i>Charles Barnett</i>	63
Horkopkv	<i>Thomas Perryman</i>	64
Yupo-yvpe	<i>Rev. J. M. Perryman</i>	66
Cvpofuce	<i>Thomas Perryman</i>	67
Hekos maketvn kerrvs	<i>Thomas Perryman</i>	68
Hvlwe tvlofv	<i>Thomas Perryman</i>	70
Uehome-eskv	<i>David Hodge</i>	71
Cesvs ve vnokeces	<i>Mrs. A. E. W. Robertson</i> ..	74
Estvkwvnyav	<i>Josiah Perryman</i>	74
Estemerkv sekares	<i>A. E. W. Robertson</i>	75
Satkv-etekvpiav	<i>David Hodge</i>	76
Fekepkv-nettv	<i>Rev. D. Winslett</i>	78
Vhauken vkhottvs	<i>Rev. J. M. Perryman</i>	83
Vktopv	<i>David Hodge</i>	84
Pu fvcket eteheces	<i>A. E. W. R.</i>	86
Tewe Wenslett	<i>J. and S. Perryman</i>	87
Hvyatkof teheceyvres	<i>A. E. W. R.</i>	89



NAKOKV ESKERRETV ESVHOKKOLAT.



ETEN CVPOFUCE.

CEHOEV ekvnv em mokken este-hunvnwv es hayvtes, momet hesaketvn eyupohauken 'sem vhesakvtes. Momen este-hunvnwv puyvfekcv wenake hakvtes.

6 MVSKEKE NAKOKV ESKERRETV.

Cehofv Eten ofvn cvpofucen ahocvtes, momet mv ofvn este-hunvnwv hayvte huericvtes.

Ekvnvn asosset eto hontekvs, Cehofvt komvtes. Eto vtekat hecetu herakusvtes, en lokce hompetv herakvtes.

Cehofv cvpofv en nvrkvpvn eto hvmken ahocvtes, mv eto hoporrenkv herat, hvtvm holwakat kerre kihocet omvtes.

Momen cvpofv ofv eto en lokce ocat vtekat esto-
men komet hompetskēs; momis eto hoporrenkv here
holwakat kerrat pahpetskvs, papetsken omat mv
nettv ofvn cē'let okv, Cehofvt este-hunvnwvn kicv-
tes.

Cehofv, Este-hunvnwv enhvmkusat herekot omes,
em vnicy en horkasvn hayares, makvtes. Momet
nuckv sufken Cehofvt Atvmen oh wikkvtes; momet
entalv hvmken a em ehset vpeswv 'meteyoficvtes.
Momet entalv a em esat hokten es hayvtes.

Momen, Tokvs heyv fune tes; momet cv fune
tes; momen vpeswv vc vpeswv tes, Atvme makvtes.
Monkv hunvnwv, erken wikket, ecken wikket, hokten
epayat vpeswv hvmkuse hakvres.

Atvme Ef tepakat afvckvke heret mv Eten cvpo-
fv ofv vtehkvtes, Hesaketvmeset em vlaket etem-
punaye ocet omvtes. Momof naorketu 'feke ofv
ocvkekot omvtes, heraket omet, momet vcacvket
omet, momet Hesaketvmese vkvsymvket omvtes.

'Momis nettv hvmken Este-nekricvt, Ef em pu-
nayat, "Mv nak' lokcat hompvs," kicvtes. Momen
Ef mv eto en lokce ehsetskvs Hesaketvmese kicvte
esvtes, momet mv en lokce vpvlwvn Atvmen emv-
tes, momen hokkolvt hompakvtes. Momof naorke-

tv e feken em eceyvtēs, Hesaketvmese mohmatskvs kievten momakekv. Hesaketvmese vnokecvkekates; momis em penkvlvke tates, vhakvn en kacet kerrakekv. Momet yafken Hesaketvmese en haken pohakof, cvpofv ofv eto ocat ofvn ēhkakvtes; momis Hesaketvmese hece tayet omvtes, en huehkvtes, momen em vlahokvtes, penkvlvkv fvcfvket, naorkaket kerrakekv. Hesaketvmese en homecet omvtes, nak' mohmatskvs kievten momakekv. Momen mv vtekat Hesaketvmese mv cvpofv vnoeckusat vtehkvre en komekot omvtes. Eten wolhuehceet vtohkvtēs, momet semvkhokv em esten vfekhonnicvtes, eslafkv-cvpko fenke esen etv welvkuecvren. Atvme Ef tepaket naoriket, momet Hesaketvmese em vhakv ycakan kvcvket omvtes. Heyv naorketvt cvpofv Eten ofv vtehkvtē vtohkepuceet omvtes.

EKNV OHONVKV.

Cace, yvmvn vts; pum ekvnv estometot omat cem onvyvranis.

Cvrke toyetskat, mv omat kerrvkokv, kerrvyat ve afvcket omes. Cvrke, estimvt ekvnv hayvte te?

Cehofvt ekvnv hayvtes, nak omvkvvn oh oake hecetskat.

Cehofv rakke mahet omeko?

Henka, cvppuce, rakke mahet, heretv mahet omes. Cace, pum ekvnv nokoftet pukko omet omes.

Cvrke, estomahes. Estomet kerretskat haks? Este ayate ekvnv yuksv 'rorat 'ra vk taskēs komvye munkvt vntat.

Monkos, cvppuce, mometskeko tayes. Heren yvkapetske tetaya?

Henka, cvrke, yvkapit, letkvyēs.

Hiyomen nettv omvlkv hvsvklatkv fvcevn ayetsken omat, hofunof ekvnv vfulotketskēs, momet pu hute hvtvm rvlāketskēs, momof ce turofv mi ayetskvte vhece emunkēs. Este sulket heyv ekvnv vfulotectvtes, perro-cukon vtehkēt, uehvtkv vk fullat.

Cvrke, vfulotkin omat, vc afvckēt omēs. Ekvnv pvlhvmke este vpoke te?

Henka, este vpokakat vfulotet omes. Em opunkv cahmeliket omes.

Cvrke, hvse ekvnv vfulotket ome te?

Hekos, momeko tetayes. Hofunetv mahen vfulotet omes.

Estomaten hvse yafke omvlkv vkladket ome te?

Cvppuce, pum ekvnv fulotket omes, momof hvsen nere omvlkv arvnayes. Naken esetska? Vm pukko tes. Tokvs, cem pukkon kulke ehomvn ocvs. Hecetskes, pvlhvmket yomuckes. Mucv pukkon rvkpvlvs. Hecetskes pvlhvmket hvyayvket on, mucv pvlhvmkat yomuckes.

Momes, cvrke, hecis. Hecvs, pukkon rvkpalvyat pvlhvmke hvyayvket on, pvlhvmket yomuckes.

Tokvs, cvppuce, pum ekvnv mv omet omes. Hvset kulke rakkēt omen, ekvnvt pukko rakkēt omes, fulotke emunkēt omes. Nettv ohfulleyatēt hvse fvcev hakes, momēn ohfulleyat elecvt nere hakes.

Cvrke, hvset ekvnv 'sen rakkēt ome te?

Henka, cvppuce, hvset ekvnv sen rakkēt omes. Cukpe-rakko-vcule sulken 'sen rakkēt omes. Momis hopvyē mahekv, cutke omet omes.

Este catvlke hvse hvresse tepakat emekusvpakat sases. Momis fvev herat Cehofv tvlken emekusvphoyvranet omes. Mvt nake omvlkvn hayvtes, Hvse nettv ohfvnkvrannen hayvtes, em merretv emunkvt omekv. Hvresse kococumpv esyomat nere ohfvnkvrannen hayvtes; em merretv emunkvt omekv.

Heren e vkétecvkes—Deut. 4:19. Nake vhake mekusvpatskeket, ce turvv hvlwe vkwapet, hvse, hvresse, vkolaswv hvlwe nake sulke ocat hecetskof, mekusvpetv, momet 'mvtotketv ce yace wites. Mvn tvlwvvlke omvlkvn Cehofvt etekvpvken emvtes.



OKETV OHONVKV.

Kvsppetvt omes, monkv totkv rakrvken pu yaces. Hetute-rakko latkes, momof ekvnv hvteces, ue-rakko, vkhvse esyomat hetutet talvpeces.

Tasahcof, nettv cvpcvke hakēs, momet lekuthe

hakēs. Pvhēt hontvke hakēs. Fuswvt hahoket, tvmecet fullēs. Eto, esse hahicet, lane hakēs.

Meske nettv cvpcket omēs; momof lihoyet omēs. Totkvn pu yahcekos. Vpettusan pu yacet omes. Kapv honhoyan etvn kayakeyēs. Tenetket, vtoyehvttes meske ohrofvn. Cvstvlē lokcakēs mesken; momen kvco, pvkanv-cate ešyomakat lokcakes.

Hiyomat pvhe-warvlke hvyvvpofvn vtotkakēs. Hunvntake, momet cepanyke tis pvhe kvrvpvrē hvse en rvkpvlrice ocet omēs, momet pvhe yuknat escvkhelocet omēs. Pvhe warke estomeckvt ome haks? Rvfo hakof corakkon momet wakov esyomen hompihocet omēs, pvhe hompvret sepekofvn.

Rvfo-hakof pvkanv, pvrko, oce-cvpkuce, aha esyomat lokcet omes.

Hetutet eto-essen elecēs, momen a pvlatkēs. Eto esse seko hakēs. Rvfo-hakof nak' omvkvvt yuknet talakēs. Matvpomet este omvkvvt pvsatkvrānes. Momis este herakat Tasahce etvn, Meske heretv mahen Cehofv en liketv ofvn ocakēs.

“Ekvnv like munken omat, nerkv oketv, hayo, kvsvppe, hiye, meske, rvfo, momen nettv, nere esyomat wikekares.” Gen. 8:22.

ETEMPOHETV.

ESTVN Hesaketvmese like te?

Hvlwen likes. Hesaketvmese hvsen hayvtes, mohmet hvtvm hvresse, kococumpv, nak' omvkvvn hahicvtes.

Hesaketvmese este hayvte te?

Henka, Hesaketvmese este hayat, nake wenahoke
fullat omvlkv hahicvtes.

Hesaketvmese heret ome te?

Hesaketvmese heret omes, hesaketvn pu'mvtes,
pu 'hecice munket omes, nettatot nere tis.

Estimvt hompetv pu'me te?

Hesaketvmeset pu'mes, mohmet atcvke nake he-
rake oceyat vtekat.

Hesaketvmese epu 'kerrice te?

Henka, monkaten omat, estomet pu 'hecicvnt
oma?

Hesaketvmese pu hece te?

Henka, pu hece munkvt omes.

Nerē tis pu hece te?

Nettv etvpomen pu heces.

Nak' oceyat kerre te?

Henka; nak' estomusen oceyis kerres.

Nak' makeyat pohe te?

Henka, nak' vkerriceyis kerres.

Estomaten Hesaketvmese ce hayat, cv hayvte te?

Kerret, e'ncakeyvren omvtes.

Estomet e'ncakeyetat kërre te?

Nak' makvten oh svpakleyate.

Hesaketvmese naken pu kievte te?

Ce feke 'somvlkvñ v'ncakvkes makvtes. Cen
Hesaketvmese e hocefkv ehvperkv hocelhetskvs.
En nettv vcayecet, cen nakvlke nak' ce kican oh
huervs. Estelehetskvs.

Nak' cv kievten oh huervkon omat, Hesaketv-
mese vn homece te?

Henka vn homeces.

"Vhakv tohwlvpecatskvte omvlkvñ cen kvpvken

vplvtvkes, mv omecece vhakv kvcatskvte, momet ce feke, cem puyvfekevu muvsen hayvkes, estomen celvranvke haks? Aeha, Eslevlke toyatskat."

"Mv este elat es afvcketu ocvkoku, Pucase Hesaketvmese makes, momekv fulecet hesahokvkes cemet." Ezk. 18:31, 32.



TVKOCA.

"Este enhorrv toyetskat, tvkocan oh vyvs, momet em vretvn vketecet hoporrenvs," Nakcokvrakko maket os. Prov. 6:6.

Hunvnwvt ot, hoktet ot, estuce tis nakcokv ohonvyetv eyacekot, momet vtotketv estomis eyacekon omat, mvt "Este enhorrvt on" kerratskēs. Este mv omakat kerratskat sase te? Nakcokv-rakko, Este enhorrvn okat, "Tvkocan oh vyvs, momet em vretvn vketecet, hoporrenvs," kicet os. Tvkoca vtot-

ke fullat hecatskyte oca? Vketecetsken omat, ece 'fvcecicēs. Hvmket oktahv ekv en rakke omvtekis cukpiket, hvlket, vlece mahet es ayet os. Momet heyv oktahv er licat, fekvpranet fekhoniyekos, momis hvtvm komvntot ayet os. Hecet liketsken yafkis, enhorrvke hehcetskekos. Lopockuset omis, nak' rakrvke 'sen cvfencvket omes. Hiyomat, estomaten este en horrv, "Tvkocan oh vyvs," Hesaketvmese kicet okat, kerratskes komis. Mv em vtotketvu hecet cvfencakat, momet mv enhorrvlke fullat es vlskvren oks. Momet cvfencvke fullvren emvhayvranan kicet okvtes. Tvkoca en cvfekne hecatskat vtotkvranatskat tvlkes komis. Tvkocat on omat, afvckvke mahet os, cvfencvket ok. Hesaketvmese, este yvmv ekvvv oh huericat, enhorre taranen omekates. Hopuetake vtekat nak' en celakv ocvket os. Tvkoca ehute estomahen halicaket os, estomecet omatskvres kice emvlahoye sekon. Hesaketvmeset hoporrenkv e'met os. Omlkeyat yv tvkoca en cvfencvke omēn omat, pu'fackvke mahes. Este, enhorrvt on omat, estofvn afvcikekos, momis estemerrre munkvt omes. Momen cvfeknet on omat, estofis afvcke munkvt omes. Monkv pu'nhorrakat omvlkvv wiket, nak' vtekan, cvfencvket celayet omvkēres, momet mvn momecēn omat, Hesaketvmese afvceciceyvres.

AFVCKE HAKETV.

AFVCKE haketv ce yace te? Afvcke haketv, Cessvs Hesaketvmese oh vkvsvmvransket os, ce hesayecvren. Mvn mometsken omat, Hesaketvmese em estuce toyetskvres, momet herēn liketskvres.

14 MVS KOKE NAKCOKV ESKERRETU.

Hesaketvmese Eppuce Cesvs vksvmetvn ce mvnícvren Hesaketvmese em'pohvs, momen mv esvrahkvn Puyvfekev-Herat ce'met, Hesaketvmese em vhakv hvsvtkan ce mvhayvres. Momof mvn vcvkayetsken omat, yvmv ekvnvn aretskis, ece 'fvcke tares. Naket ce penkvlehcekos. Elkv tis ce penkvlehcekos, momen ce'lis, cem puyvfekev hesake munkv tares. Afvcke munkv tares. Estofvn este-merikekos. Estofvn ehlekos. Cesvs hecet likvres. Este faccvlken hecet likvres. Esyvhi ketvn ocaket vpokēs. Hesaketvmese em estvlke haketvn estimvt komen omat, em este haket omēs.

HOLWVKE OPUNVYETU.

OPUNVKV holwvke este opunvyehcetskvs. Nake holwvke a em pvlehcetskvs. Vnokeckv ofvn este ce'ncakekatan encakvs.

Cesvs pu'ncakvtet omekv, pumeu ete'ncakvkeres. Cesvs Hesaketvmese Eppuce mahusat omet, eyaskuset, momet efeke kvncapusate omet, Hesaketvmese em estuce toyetsken omat, ceme Cesvs etvpomvranetsket omes. Momen ce naorihocis, cvpvk ketv opunvkv opunahyetskvs. Nake ce kihocis, este nvfiketskvs. Hesaketvmese em estuce eyaskuset, cvpvkkekot omvtevs.


Hesaketvmese "este eyaskusat heren huericvres, momen este eyaskusat em vyetv heren emvhayvres."

"Cem estvlke em etenrvwv nak' onkv esarv omet 'setoh vhretskvs, momekat ece'nakuecv e catv vnrype huyiretskvs, vnet Cehofv toyis."

"Ce feke ofv tecvkketskvte en homehcetskvs."
Lev. 19:16, 17.

“Este vnakuecv oh laksat svnvfketv tes, eslafkv-cvpko tes, momet re fvske tes.” Prov. 25:18.

“Estvmvn eto sekon omat, totkv aslēs; momekv estvmvn nanvkokv sekon omat, etehvnkv wikēs.” Prov. 26:20.



ESTE FEKE HOLWAKAT.

Ce feke ofv holwvyeckv ocat kerratskes. Momen Hesaketvmese naorketv en homecet omāt kerratsket omes. Momet Atvme Ef tepakat cvpofuce ofv wolhuehocvtes naorkat vrahkvn.

Monkv ceme mehenwvket omekvs, mv Hvlwe-tvlofv naorketv sahsekos komet. Monkv Hesaketvmese este naorkv em etektvneceen escehyekos. Monkv Hesaketvmese-em-estvlkeu naorkahkekos. Momet puyvfekcvu Cesvs teropotte hesahokateu naorkahkekos. Naorketv Hvlwe-Tvlofv sahsekos.

Momis ce feke holwvken ocetskes, naorketv vno-
kecen. Momet holwvhoken es vkerricetsket omes.
Momet ce cvpvkkes, momet c'eksvmes. Heyvt ce
feke holwvke tat kerkuecet os. Nake etv sasat ker-
kuecet os; ce feke holwvke tat nettv omvlkvn. Na-
ken estomvranetske haks? Ce feke holwakat Hvl-
we-tvlofv es ayetskeko tayekv. Este naorketv vno-
kecakat hvlwe-tvlofv seceyekot omekv. Naken esto-
mvranskat cem onayvyēs. Atvme en hopuetakuce
vtekat efeke holwvhoken es heckvkvtet os, cenake
etvpomen. Heyv ce feke holwvke ocetskat etv hāhket
hvsvtke hakof tvlken, Hvlwe-tvlofv eceyetske teta-
yes. Hesaketvmese tokat ce feke holwakat etv ha-
yekos, monkv Hesaketvmese em'pohvs CESVS KLIS-
TIAHV, Puyvfekcv Hvsatkusan atohten, ce feke
holwakan cem vkueyicet feke mucvsen ce'men, nake
herakat vnokece tetayen. Hesaketvmese Puyvfek-
cv-herat estimvt em'pohen omat, e'mvranet makvtet
os, pu Hesayecv vrahkvn. Monkv heyvt nake vfas-
tvranetskat tot omes. Ceme e emvnicetskeko ta-
yes. Momis Hesaketvmeset ce 'mvnicet ce feke cem
eticvren em'pohvranetsket os. Hvmmaket ce me-
kusvpkvt omekvs. "Vc ofvn feke hvsvtken hocvt-
cvs, Aeha Hesaketvmese, momet puyvfekcv fvccvn
vc vpikvs maket."

FVCCVN PUNAHYOYVKS.

ESTOFIS fvccvn punahoykvtevs. Estofvn, nak
fvceeko vfastatskat, ehettv kohmatskvs, momis fvccvn
punahoyvks. Monkon omat, estit cem vkvsahmv-
kekos. E cukwv laksat Hesaketvmese en homecet
omes. Laksvlke em vpoketv vkhvse tohottoplane

totkv setenekret omvres. Hesaketvmese heyv maket omes. Em opunvkv sumikekos.

Este-laksv toyetskvten omat, Hesaketvmese merretv em'pohvs, momen ce'mvnicen omat, svnvcomv naorketskekaren.

Opunayetskat omvkvv fvccv opunvyvs, monkon omat vcewe min ce feke cen nokkievres.

Aeha Hesaketvmese, estuce yekcusekan emvnics, Cesvs svrahkvv. Vc vhecievs, yv naorketv rakat ofv cv lvtkekaren.

"Ete'n lvkisatskvs, este vculat, em vtotketv es vpvken vvikatskvttet omekv." Col. 3 : 9.

"Estimvt ehkuse vnakuecv oh laksat mvn tahcit vwikares." Ps. 101 : 5.

"Lakse nake kerkuecat estemerkeko huerekares, momen lakse opunayet estermerk v en kvpvkekares." Prov. 19 : 5.

"Cehofa, estimvt cen cuko ofv vre taye haks? Estimvt cem ekvnhlwe like taye haks?

"Mv mehenwe yvkapate; momet fvccetv vtotkate, momet e feke ofv mehenwv opunayate.

"E tulaswv este es opunvycekate, momet vnakuecv nake em vhopvnekate, momet vnakuecv nake holwvke kihocis 'mapohicekate. Mv este ehomv este holwvyecat vrakkuehocekot omes. Cehofv em penkvlanan vrakkuecet omes." Ps. 15 : 1-4.

FO.

CEPVNVKE hoktvkucvlke enhorrakat fon ohvpeyet, es en kerrvkepe taves.

Fo yekce mahen vtotkakak omēs. Meske, hvse



aossat vpaken, sosset vtotkakēt omēs. Hvso-hiyv ofv tis vtotkakēt omēs, momet en hompetv e hutē hericaket omēs. Mvn rvfo orof en hompetv ocakēs, en cvmpe hayvranat pvkpvke sekot omes. Mesken en hompetv hericaket, rvfon es emehakaket omēs.

E tulaswv cvpevken ocakēs, pvkpvke es lasakat. Vnakvn hueret vketecetskēs, estomecet en cvmpe cawet omat, em etetayof e hutē es vpeyēs.

E hute omvkvni fo rvkrakat vpikē vlket omēs, mekko-hokte kihocet omēs. Mon enhorrvket sases, vtotkvkekot. Momen rvfo orof vtotkakēt vtotkvkekan sossicet omēs. Monkv heyv fo enhorrakat omvkekot, momis fo cvfencvke vtotkakāt, mi omvkes.

Fo semvnole Cutev ofvn tayet omvtes, momen en cvmpe eto hauken, monkat cvto hauke tis 'svtehet omvtes. Cutev wakov-pese, momet fo-en-cvmpe tayen 'se vfvstaket omvtes. Cane Paptisv vnrwvn arof, nake hompvte hvmkat fo semvnole en cvmpe tates.

Tewe nakcokv Hesaketvmese es vkvsvmkv ofvn,

Hesaketvmese em opunvkv fo-en-cvmpen es vhopa-
yet omes.

“Hesaketvmese em penkvkv hvsvtket omēs, oce
emunkvt; Pucase em vhakv mehenwet fvcce vlket
omes.

“Cvto-konaplane 'sen heren eyacvke tayet omes.
Henka, cvtokunaplane herat sen herēt omēs; fo-en-
cvmppe tis, momet fo-en-cvmppe hute es ocis 'sen
cvmpet omes.” Ps. 19:10.

“Cem opunvkv lasvyat cvmppe mahet omes. Hen-
ka, fo-en-cvmppe 'sen cvmppe cv cukwv 'sem momes.”
Ps. 119:103.

LVKCVT LVKCVPE HAYET OMES.

NAK' omvlkv em munkv ocet omes.

Lvkevpe oton ettihekos. Lvkvvt hontet lvkev-
pe rakko hayet omes. Vceu, telekon ettihekos.
Pvrkou etofvsken oh lokcet omekos. V kacou ke-
rakkon ettihekos. Hesaketvmese hvlwe estvlke,
hunvntake hopuetakuce tis em munkv ocvke vlket
omēs.

Momis heyvt omvlkekos. Pusuce puse rakke
hakvres, yvpefikuceu yvpefikv rakke hakvres. Ce-
pvnvke holwvyecakat hunvntake herake haye ma-
hekot omes. Cepvnvke herakat hunvntake holwv-
yecvke haye mahekot omēs. Cepvnvke herake oma-
ket fullēs, momis e feke en hecēs kot omekv, holwv-
yecvke tis saset omēs. Momekv vculakof vyvkhvm-
kusen holwvyeckv vfvstakēs; momis heyvn kerret
okes; mvt holwvyeckv enhvteceskv tokot omes.

Cepvnvke holwvyecakvte vculakof, hunvntake

hervkeko vlkvranses, lvkev lvkevpe hayat etvpo-
men. Heyvn okis, nake em munkv wikekon omat,
ohvtvlaket vyecice munkvt svhere mahe hakēs. He-
saketvmese en herkv e feke oh vtotke estomis, nake
here ettilcekos. Mv omekon herkv vtotket omes.
Monkos; este heren hahyet omof, momusen em ette
heren hayat omēs. E feke fvccvn hayat omes. Mo-
mof vkerrickv tis, opunvkv tis, em vretv tis omvlkv
heren hayat omēs. Heyvt Hesaketvmese em vtotke-
tv tes.

Cepane cvpvkketsket on omat, hunvnwv cvpvk-
ket ome witetskvres. Hvtvm hokluswv cvpvkketsket
on omat, hoktvl cvpykke heret ome witetskvres.
Heren ce mvnettof vketecvs, naken ometskat, mo-
mis nake toyetskat here mahen vketecvs.

“Cem etehohsvkates; Hesaketvmese svhkopvn-
esko tayas; naken este vhocvten omat, matvwvn
vteloyvret okv.

“Estimvt em vpeswv vevkvyen vhocvten omat,
vpeswv aossen vhopvnetvn vteloyvres, momis pu-
yvfekev vevkvy vhocvte, puyvfekev aossen hesaketv
yvksv sekon vteloyvres.

“Momen nake here vfvstetv es pu hotosahkates,
tetaye orof, feketv pun heckvres, pu'nkvsymkekon
omat.” Gal. 6:7, 8, 9.

NAORKETV LOPUCKE SAHSEKOS.

CVRKE, naket kerris, Melucet kicvtes. Momen,
Moman naken kerretska? erket kicvtes. Momen
“Hvthvyvtkeise, naken vm onayet oketskat kerris;
Atvmen oketskises. kicvtes. Momen, “Mehenwvts,

Atvme tis en oketskes, erket makvtes. Este-hun-vnwv enhvteceskv Hesaketvmese hayvtet os. Momen Ef hokte enhvteceskv tates. Hesaketvmese nake momehcatskvs kievten momecakvtes, momet svnvcomv vcacvkekates. Momen en hopuetakeu efeke vcacvken es heckvkekates. Pume Atvme Ef tepakat en hopuetake toyēs. Momen este vtekāt mv en hopuetakets. Momen omvlkeyat hopuetake naorkvlke toyes. Momis Atvme Ef tepakat, Hesaketvmese naken momehcatskvs kicen, momecaket omvte vm onayatske taya? erke kievtes. Momen, Henka, vntat onayvyēs, cepanat makvtes. Momet, Eto em ette celahyatskvs kievten mamakvtes, kievtes. Nake cem onahoyvte vkerricepetv kometskat yc afvckes, erke kievtes.

Hiyomat, heyvn vkerricepvret kometske te? Naorketv lopucke sahsekos. Purkvcke enhvteceskv eto em ette celahyatskvs kihoe estomuse en mamakvte, naorketv cōtkus komakvtes. Momis yv naorketv rakke tates, Hesaketvmese rakke Hayvte likān vnaorketvt omekv.

Yv vn hopuetakeuce toyatskat, nettv ce hesahokvkat omvl' yv vkerricēpetv komatskvre te? Nake estomis, naorketv cotkusekv komet, estofvn celahyatskvs, momis nake estomis Hesaketvmese vsehvte momecetv, naorketv rakket omes. Mvn vkerricvkvtevs.

NAORKETV.

ESTUCE heret ometsken omat, este ce kerrakat ce'nokecvke tares. Este here ce hakvre kometske te? Henka kometske oces. Momis ce feke ofvn

naket liket on omēs, ce hervre, ce 'mvn vttecat. Mv
 naked ce feke ofv vpikat, nak' holwvke tis momecvs,
 ce kicet omes. Naket ome te, ce feke vpikat? Na-
 orketvt omes. Este ce herekos, holwvyeckv nak' ce
 kican momecetsken omat, Holwvyeckvt omēs. Cv-
 pvkke ce hayat, momet enhorren ce hayes. Holwv-
 yeckvt nak' fveceko opunvyvs ce kicēs, holwvyecets-
 ket on omat. Naorketvt esten opunvkv holwvken
 makepueces, momet horkopicēs, momen etepoyet,
 etelecet omes. Estofis naorketv cvpvkktvn hayes.
 Naked etv naorketv en holwvke omat sahsekos.

Cesvs Hesaketvmese Eppuce vlakat, etohwelepkn
 oh elvranat vlaket omvtes. Mv momat naorketv pun
 kvpvkvren omvtes. Cesvs momekaten omat, naorketv
 emeyuksvsekvnt os, momen espoke estemerkv ofvn
 epu'totvnt os. Naorketv vnrvpvs, momet Cesvs vno-
 kecv, ce hesay'ecvrane vlakvten. Hesaketvmese cen
 naorketv ce feke ofv ocat, cen kvpyecice tayen,
 momet heren, hvsvtken ce haye tayen, em'pohet
 mekusvpvs.

HOLWVYECKV MOMEN ESTEMERKV.

MELE, cepanat, erken esyomet Atvme Ef tepa-
 kan opunvyecet fullvtes. Cane en hopelkn yiev-
 tes. Momof estomaten yv etecvkkatskat ena ekvn
 ofvn wvkechoyat kerratske haks? erket kievtes. Mo-
 men, Vne kerris, Melet makvtes. Momof etoropus-
 vv em pvlatkvtes, Cane vnokecusvte vkerricat, hv-
 kihhoke vlket omekv. Kerris, elepekv, heyv wvke-
 cet omhoyēs; makvtes. Momis, Estomaten elet ome
 haks? hvtn maket erke vpohvtes. Momof, Enok-
 ket ok' omekat haks? Melet kievtes. Momen,



Enokke mahet omvnkes, momet taven estemerrvn-
 kes, kievtes. Momis vpohetv etvn ce'mpohares.
 Estoman ce cerwv Cane enokket omvt haks? kiev-
 tes. Momof em vyvposketvn kerrvkekates. Momen
 erket em onayvtes, Yvmv ekvnv naorketvt sekaten
 omat, nake nokke sekon, elkvu sekvnt omēs, kievtes.
 Momis naorketv estemerkvranat tvlken, Hesaketv-
 mese em vhakvt maket omēs. Momen elkv t heyv

estemerkv hymkat tes, ce cerwv Cane erkvket na-orkvktet ok, elet omvtes; momet holwvyece em munkvt heckvtet omekv. Omvkvvt pvsvtkvrana, heyvt fvccv tes. Momet Hesaketvmese naorketv en homece tat, momet estemerricat nettv omvkvv oh kerkuecet omēs. Yvmv ekvvv efeknocketv pun heckat vtekat pum munkv, naorkvt omekv os. Momis heyv omvl' muntalat tokot omes. Este e na elehpof, este em puyvfekvt estemerkvranat ocet omes. Mv puyvfekv elvte sekata, mvn estemerkvranet omes. Momen Hesaketvmese en nakcokv-rakko ofvn puyvfekv naorkvlke vtekat estemerhoyvranet omēs, maket pun kerkuecet omēs. Afackakuset hvlwe-tvlofv vpohkekos, momis Este-nekriv hute min, mvn estofis estemerhoyet vpokvrana vpeyvres. Momekv mimv liketv senhoneckat vk hvtvphoketv ce yacvkekot omen kerrikv, emekusapv hakepatskvren cem vcahnkvvyet omes. Momet hvlwe-tvlofv min ahoyehpet, mvn estofis afvcke munkvt kakepatskvren komit okis.

CEHOFV HOPORRENET.

MELE, Cepana, erkeu esyomvket ykvvpaket, cvpofv ofvn fullvtet, hotosakof, eto elecvn 'rvpokvtes. Momof erke herat, Hesaketvmese rakke pu Hayvte likat, nake sulken es cem onayvkis. Monkv hvtvm es ce mvhayvranvkis kievtes.

Hesaketvmese hoporrenet omēs. Nake omvkvv kerret omēs. Este estomet nake mucvsen Hesaketvmese em onayeko tetayes, Estofis hoporrene munkvt omēs. Hvlwe-este sekona, este hunvntakeu,

hvsen, ymvv ekvvu, kococumpvu sekof, ekvv ha-
 hohyen, este oh vpokvranat omvlkv kerre tates.
 Yv hiyome ce kerrat etvpomusen, momof ce kerre
 tates, naket mucvse en sekot omepekv. Mucv nettv
 ceme vne tepakeye opunahoyeyat omvlkv kerret
 omēs. Momet opunkv opunahoyeyvte vtekat omvl-
 kv kerret omes, momet nake vkerriceyat tis omvl-
 kv kerret omēs, momet nake vkerriceyvte vtekat,
 momet naken vkerricvraneyat tis. Pu hesahokat
 vteken omvlkv kerret omes. Momet ymvv ekvv,
 este-hunvntake, hoktvkeu hopoetakeu oh fullate
 vtekat, nak' momecakovte omvlkv kerret omēs.
 Heyv nake omvlkv, momen 'sen sulkis, Hesaketv-
 mese kerrvve en yekicekos, naket en yekcekot ome-
 kv. Naken kerreyet on omat, eme nake omvlkv
 kerret omes. Este estomet Hesaketvmese emvha-
 yvt huereko tetayes. Nake hvnken hvvm cem
 onayvkares, kerratskan heres, Hesaketvmese en
 nakcokv-rakko vcaakat ofv, em'pohēn omat, hopor-
 renkv pu'metv vkvsamuset omen, pun kerkuecēt
 omes. Hoporrenkv fvccan pu mvhayvranan mv
 nakcokv pu'mvtet omes. Momen nake makat omvl'
 mehenwv tes. En nakcokv-rakko nakcokv mehen-
 wvts. Mv este Hesaketvmese em penkvlyke, em
 vtotkakak, en nakcokv ofv esetemfvccetv sulket em
 ocet os. Momen esetemfvccetv omvlkv mehenwvt
 omakes. Hesaketvmese esetemfvccetv heromvke
 este en hahicvte omvlkv vcayecvres. Momen este
 vrakkuecvkekat vtekat nakcokv ofv esetemfvccetv
 mvn em ocet omes vnrpvranat. Hesaketvmese
 nak' makvte momecvranat tvlkuset omes, ehelakse-
 ceko tayekv.

Hesaketvmese esetemfvccetv hayvte ohonayet heceyat, punake tokon omat, oh vkerrievraneyet omes. Momen punaket on omat, pu feke afvckvkvrant omes, herakvres komeyet ok'. Momen Hesaketvmese nake makvte ohonayet pohen omat, pu penkvlvkvrant omes, epu'nrpve tis opunaye tayekv. Momet Hesaketvmese naorketv omvl', Eppuce vnocekusat vrahkvn, pun kvpicvren emekusvpvraneyet omes, momet en cvpvkke en kvpvken pu hesahuecvren. Hesaketvmese em-este fvccetv vnocekakes, nake mehenwv tokat makahkekos.

Laksvlke Hesaketvmese en homece mahet omes. Este ecukwv laksat en homecet omes, momet mehenwv toko opunahoyat estemerrvkuecvres. Yvmv ekvnv tis estemerrvkuecet omes. Momen ekvnv hvmkateu estemerrvkuecvranat tvlkuset omes. Eme mahusat, laksvlke vtekat Este-nekricv e hute ofvt em vpoketv tares, makvtet os. Monkv yv vn hopue-take vnoķēcusvyat omvlkv, heyv nake en kerkuecvyat omvl' vkerriecpet e feke vte heren mehenwvn opunahoyvre te? Momet hvlwe Erke likat em Puyfekev vcakat e'mvnicvren emekusvpakate!

NOKUSE.

NOKUSE ponvttv cvpvkktet os, momet eto ofvn aret omes. Nokuse rakket omes, mont eto vcemket omes. Nokuse fo-semvnole em vcemket, en cvmpen en lokes. Enkususuwn es korret, nak' yvlonkvn a cawet, papet omes. Cvpofv tis vce ocan oh ceyet, este'n nokset omes. Sukhucen hvtvm papet

omes. Nokuse em vpeswv hompetv heret omes. Nokuse hvrpe heret omes, rvfon atevken, esse es hahoyet omes. Este fayat nokuse mvnnettan en



nokkicen omat, ecket este tepoye munket, ehle tvl-kuset wiket omes.

Cusvlke em etvlofv nokuse rvkrakat tayet ful-lvtes, momet yvpefikv, wakv, este esyoman pvsatv-tes.

Ahvmkv Hesaketvmese em owalv Elisvs hocef-kvt Cusvlke eme tvlofvn Cvleko orof, hopuetakuce sulket asosiyet vevkvpeyet, hocefkv holwahoken ho-cefakvtes, momen Hesaketvmese eyacekat nokuse-en-hoktvke hokkolen vtohten, mv hopuetakuce hol-wvyecakat pale osten hokkolohkakan pvsatvtes, Nakcokv-rakko maket os.

LOKCE HERAN HOLWAKAN TEPAKEN.

Eto en lokcen es kerreyet omes.

Eto herat en locke holwvke lokicekos.

Eto holwakat en lokce heren lokicekos.

Svtv-rakkon eseyat eto oh lokcat svtv-rakko em vpet on kerrēs.

Matvpomen estuce naken estomat kerrēs.

Cepanat horkopen omat, horkopvt on kerreyēs.

Hoktuce naket mehenwekate maken omat, mehenwvn vnokecekon kerreyēs.

Estuce herat nake herakan celayetvn komet omes.

Estuce herat Cesvs Klist Hesaketvmese Eppuce oh vkvsamet omes. Hesaketvmese vnokecat 'Eppuce elvranen emvtes, hesähuecvranet.

Estuce herat Hesaketvmese em vhakv omvkvv kerretvn komet omēs.

Monkv èto en lokcen es kerreyet omes, matvpomen estuce naken estomat kerrēs.

HESAKETVMESE EM-ESTE, MOMEN YVMV

EKVNV ESTEN.

YVMV ekvnv este mvrahrkv nvcomv te? Melet erke kievtes. Erke en cuko ofvn nakcokvn Mele hecvtes, momen este catvlke, este lvtvlke, Cusvlke tis en heckvt ocen hecvtes. Momen etv sulken hecvtes, este ohonkv pohvte sekis hecvtes. Momen yv hoktuce nake vhake hecat es afvcke tates. Este mvrahrkv nvcome te? maket vpohvtes. Momen erke em vyvposkat, Hokkoluses, kievtes. Momen,

Kut! Cvrke, yv nakcoky ofvt on omat, sulke mahes, Melet kievtes. Hokkolusat 'sen hoyvnet on kerris, makvtes. Yv hoktuce vne okvyat token oks. Ekvnnv ofv vne este hoccfhuecvye tayat sen sulket omes, ekvnnv hopvyvke mahis vpoket, em atcusvke tis mvrährvkvn vchoyet, momet em punvkv tis mvrährvket on, nak' makakat tis t'en kerhoyekot omes. Momis yvmv ekvnnv este mvrährvkv hokkoluses makvyat, cem onayvyēs. Hvmkat Hesaketvmese vnokecvkeket, em vtotkvkeket, e feke naorkvke hvsvtke en hahoyvte sekot omes. Heyv esten, yvmv ekvnnv este kihocet omes. Ekvnnv vnokecvket ot, ekvnnv nak' vtehkateu vnokecvket ok, Holwvyecv en hopuetaken kihocet omes. Setvne Hesaketvmese vnrapv e pucase tat naorketvu esemevpayvt ok'. Este afvckvkeket omes, ekvnnv vnokecvke mahet omekv. Estofis ofv vpokvranekat kerrvket omes. Naorketv vnokecvket o estomis, naorketv em estemerretv vkvsvmkvranat tvlkuset os. Este naorkvlke nettv omvlkvn Hesaketvmeset en homecet omes. Momen este vpvlvv Hesaketvmese vnokecvke em vtotkakates. Efeke emvrahkuehocvtet omes, momen nake herake en homecakyte vnokecvket omes. Momet nak' holwahoce vnokecakyte en homecvket omes. Heyv este Hesaketvmese en hopuetaken kihocet omes. Hesaketvmese vnokece tat vhecicet, em merret omes. Yvmv ekvnnv vtehkof vhecicet omes, momen pvsatkof; hvlwe-tvlofvn es ayet os, estofis afvcket mvn vpokvkepvren. Monkv hiyomat, heyvn este mvrährvkv hokkoluset os, yvmv ekvnnv. Hesaketvmese em estvlke token omat, ekvnnv, momet Setvne em estvlket omes. Heyv eshokkolat vm

estvlke estoman enhopoyepe haks? Mele, Hesaketvmese em estuce toyaret komis, makvtes. Momen, Momen vnewe, cepanat makvtes. Momen heyv hopuetake erke Hesaketvmese em estvlke mehenwv tate komvtes. En hopuetakuce Hesaketvmese em esten sohhonkvtkvren emekusapvtes. Momen este hvsythvket, heraket, en sehoketv fvccvket omakvten, pvsatkof, hvlwe-tvlofvn min svpehoyvren mekusapvtes.

HESAKETVMESE EM ESTE VCACAKAT.

HVLWE-ESTE nake tat pum onayetske te? cepanat erken kicvtes. Momen estomvke tat estomusat cem onayvyēs, kicvtes. Hvlwe-este vcacvket omes. Hesaketvmese em vtotkvranan hahicet omvtes. Hesaketvmese este-hunvnwv hayekof, momen ekvnv hocvckekof, hvlwe-este hahoyvtet omvtes. Pumie omvkekot omes, ena punake omvkekot omes, momen hvlwet em vpoketvt omes. Momen Hesaketvmese rakke vcatat mv hahicvte vrakkuecetv vnokecvket omes. Momen estvn vpeyvks, Hesaketvmese kicat, pvfpvne mahet omes. Momet nake momecvks kicateu yekcvke mahet omes, momet Hesaketvmese nake komat kerretvn hoporrenvke mahet omes. Momis en yekcetv en hoporrenkv vtekat Hesaketvmeset e'mvtet omes. Mvt omekon omat, naken estomahkekos. Pume hvlwe-este hecēko tayet omes. Pu turwv puyvfekvllken hecvkvranen hahoyekates, momen hvlwe-este puyvfekvllkets, Hesaketvmeset em este hechoye ocvtes. Hesaketvmese momekvs komen este ome e hayen hecet omho-

yvtes. Momen pume hecēko taye estomis, eme pu hecvke tayas. En sulke estomuset hvlwe-este pu hecat kerrēkot omes. Momet nettv nerre omvl' en sulke estomuset epu'fulote tat kerrēkos. Momis nake hvmken kerreyet os. Estofis Hesaketvmese e turwv ep oh renaye munkvt os. Mvn estofis pu hosvranēkot omes. Hesaketvmese em-estvlke vca-cakat em vhonkvtkv kerrēko tayet omes. Vhonkvtkv, pum vkerrickv er ore tayat sen sulket omes. Hesaketvmese nake komat momecetv emehakvke vlket omes. Nake kicat vteken omvlkv vpeyet yi-cet omes, momen omvlkv afvekvket omes, vcačvket ok'. Hesaketvmese vrakkuēcēn omat, pumeu pu 'fvekvke tares. Momen yvmv ekvnv nake koman momecēn omat, Hesaketvmese em-estvlke heceyv-res, momen puna pvsatkof, mi hvlwen pum puyv-fekecv 'rvpvkepves.

TEWE MEKKO.

TEWE mekko ohonkvv kerretv ce yacet omes, komis. Mv este-hunvnwv Hesaketvmeset vnokece tates. Momet Tewe hunvnwv orof, yvpefikvn vhecicytes, momet kerrekates hesake emunket mekko hakvranat.

Ahvmkv Tewe cvpofv ofvn en yvpefikvn vpaket arvtes, momen este-papvt nokusen tepaket vlakovtes, momet yvpefikv hokkolen cvwakvtes. Yvpefikuce estemerrusvtes, pvsatet hompvkvrantvtes, momis Tewet este-papv nokuse tepakan assecvtes.

Enhvmkuset omat, este-papv nokuse tepakat



hofunekon pvsvtares, komvtes, momet em penkvle-
kates.

Estomen Tewe penkvlekat haks? Hesaketvmese
hesayece tayen kerret omvtes, hiyomet on penkvle-
kot omvtes. Momet Tewe este-papv nokuse tepa-
ken pvsatvtes.

Momen hofunusof, este-hunvnwv rakke mahet
Cusvlke etepoyvranet vlakvtes.

Mv omof, Tewe mekko tokates, mekko Sal ho-
cefkv tates.

Estimvt mv este rakkat etepoyetv eyacekates,
omvlkvvt tayen penkvlvke tates. Mv este rakkat
holwvyecet, Hesaketvmese em penkvlekat omvtes.

Tewe mv este rakkon hecat, estimvt osiyet ete-
poyeko tetayen kerrvtes. Momen Tewe Sal mek-

kon, Aeha mekko, ce penkahlates! Vnet ahyit, mv este rakkat etepoyares kievtes. Momis Sal mekko em punayet, mv este rakkat etepoye taye oretskekos, ce'levres, kievtes.

Momen Tewe, Hesaketvmese este-papv nokuse tepakan en kvpvken cv hesayecvtet, vm vnicvres, mekkon kievtes. Hesaketvmeset mv este rakkat enke en kvpvken cv hesayecvres, Tewe opunayat kievtes.

Tewe, Hesaketvmese em enhonret, este rakkat etepoyvranet ayvtes.

En horre yekcat eslafkv-cvpko cufunfske tepaken cvwē tates, mont elecvtanet emehakvtes. Momis Tewe cvto-svfvlvkn cvto tepakusen ocvtes. Tewe Hesaketvmeset em vnicvret on kerrvtes, monkv eslafko-cvpko cufunfske tepakat em penkvlekates.

En suletawv ehomvn vlakof, este-rakkan vnrvpvraret letkvtes. Momen cvto-svfvlvkn cvton vpiket es nafkvtes, mohmen cvto ekvn eceyvtes. Mohmen este rakkat tvk lvtiken, Tewe oh letiket, eslafkv-cvpkon a em eset, nokwvn es en tacvtes. Tewe mv este rakkat eleceko tetayvtes, Hesaketvmese yekce-tvn e'mekaten omat.

Cehofv oh vkvsymeko en nokkievre en kvpvken hesakvtes.

Sal eppuce tepakat pvsatkof, Cusvlke Tewen mekkon hayvtes.

ESTE HOPORRENEKO NAKE MAKVTE.

TEWE mekko owalv Hesaketvmese pum oh onaye mahet omes. Heyv nake here mahet omes. Momet este nake makvte tis pum onayvtet omes, vhmkv

este hoporrenekat nake makvte, pum onayet omes. Heyv tes, "Este hoporrenekat e feke ofvn Hesaketyvmese sahsekos, makvtes." Este hoporrenekat nake estomen make tayat estimvt keriyekos. Fvccv-hakeko opunvyetvt em vtotketv tes. Momekv mv tvlkusen vkerricet, lakset, nake mehenweco, hoporreneko sekat tvlken opunvyecet omes. Estimvt nake maket momecet omat, kerrvkat heret omes. Horkopvlke horkopaket omes, vkerrvlke vkerrake vlket omes. Laksvlke mehenwv onvyahkekos. Este ekvsamv nake onkv sulecet omes, onkv rvkrvken onayet omes, momen este hacohakv okhackvn opunayes.

Estimvt mv nakcokv esetskat emet hocackvtes maken omat, momet estimvt hoccicekates, estimvt hayekates maken omat, vkvsametske te? Mönkos, vkvsahmetskekos. Momēt omen omat, estoman heyv sutv vkolaswv es fvcke ocat, eto-esse tis, fuswv tis, nake ele-oste rvkrakat tis, rvro tis, canv tis, pvkpvke tis yomakat omvlkv emet hocackvtes, hahoyekon, makvke taye haks?

Hesaketyvmese sahsekos, maketv mvrahrvkv tut-cenes.

Opunahoyet makaket sases, momis mv omakat sulkekot omes.

Este Hesaketyvmese sahsekos, maken pohetsken omat, lvpken em vkuekekvs. Holwvyecēs, vhopvnkēs. Momis en homehcetskvs, ehvhnetskvs, momis "Em merrvs, Hesaketyvmese," kiekvs. Heyvn kerrvs, emekusvpekot omēs.

Vpylvvt efeke ofvn Hesaketyvmese sahsekos makakēs. Hiyomen este hoporrenekat maket okvtes.

Este momakat, Hesaketvmese sekate! komakes. Este momakat holwvyeckvn em vlostvket omakēs. Mome estomis holwvycecyat svrahkvn, Hesaketvmese pu'stemerricvres, komaket penkvlaket omakēs. Momekv Hesaketvmese ep ohfvcecvre sekate! komaket omēs. Hesaketvmese ehlekos, vcuhlekos, estofis wenake emunkvt omes. Momekv sekate! komaket es vpeye estomis, like munkv tares.

Vpvlwvt em fulletvn Hesaketvmese sekos es makaket omēs, Hesaketvmese sekon omat, estomet fulle tayat ore heren fullaket omēs. Emekusvpvhkekos. Feksumketvt en cakken omat oh huehkake wites. Este mv omakat, Hesaketvmese ehvnykeko estomis, vrvkkuecvkekot omakes. Sukkv lvkevnpvpaket omis, vnvtkiset lvkcvpe huerat hehcekos, nake en hecke hompat, mimvt es fekhere sekot fulles; mv omaket omes, Hesaketvmese vkvsvmvkeko fullat.

Hesaketvmese em vtotkvkekot, momis heyv ekvnv, ena vpeswvn, Este-nekricvn asyomen em vtotkakket omakēs. Em opunkvv hecake estomis em en hervhkekos. Hesaketvmese vnokecvhkekos. Nake sulecetvn eyacvket omakēs, vkvsvmhoyvre tis, cvtokunawv tis, vfvcketv yvmv ekvnv kice ocat esyomakat vnokecet; Hesaketvmese vnokecvkekat omakēs. En homecvke mahes. Em vhakv vfvstvhkekos. Vnaorkakvte efeke es nokkicaket, naorketv wikvhkekos. Hesaketvmese em estvlke yorecvte, este-nekricvlke tis, vkerrickv oakat em oricvkekot omakes. Este-nekricvlke Hesaketvme likat vkvsvmaket fekekaket omakēs. Momis heyv este take Hesaketvmese likes kome vkerricakis, afvckvkekot,

momet penkvlvkekot omakēs. Penkvlakuse ocen
omat, lvpkusen ehosakēt omakes. Este heyv oma-
kat yvmv ekvnv tayet omēs. Nake sulke mahen
kerrvkēt sases. Momis Hesaketvmese kerrvkekot
omakēs, kerreyes kome, vfekhonnicvketv eyacvkekot
omēs. Cvtokunawv ocaket, ekvnv ocakes. Momis
estemerrakuset omakēs. Cehofv ocvkekot yvmv
ekvnvn oh fullet omakēs. Rakke kihocat sases, mo-
men hvlwen kvwvpkakes, momis lvpkusen totkv-
rakko sufke herat ofvn akhvtvpecvres. *Mv en svpvk-
letv senhoneckvkēs. Ceme mv fullat toyetska? He-
saketvmese sekos kometsken omat, cem vretv etice-
kot vretske tayes. Hesaketvmese vnokecetsket o
haks?

PU HESAYECV.

ATVME Ef tepakat holwvyecakekv, Hesaketvmese
mv cypofuce vtehkvre en komekot omvtes, Hesake-
tvmese hvsvtket omekv, momet holwvyeckv omvlkvn
en homecet omet.

Atvme Ef tepakat herake hvsvthakvte vnvcomvn
momekates. Hesaketvmese vnokecvkekot omvtes.
Momet vkerricetv eyacvkekot omvtes, holwvyecvke
heret omvtes. Momen Hesaketvmese en holwvyec-
kv taken 'sen homecet omvtes.

Hesaketvmese eto em ette homipatskvs kicvten
hompaken, monkat esaken omat, ce pvsvtkvravkat
tvlkus, kicvtet on kerratsket omes. Monkv Atvme
Ef tepakat pvsvtkvr Janet ot kerrakvtes.

Mehenwvt omes, em puyvfekev pvsvtkeko tayet
omvtes, puyvfekev estofis hesakē munkvt omekv.



Momis puyvfekev omvlkv Hesaketvmese hvlwe likat
'rvpaket vpokvranekot omes.

Liketv estepenkvlcet totkv-rakko kicetvt liket
omēs, holwvyecakat em puyvfekev vpeyvrnat, esto-
fis, Puyvfekev holwakat, momet em estvlken er vpa-
ket vpokvranat. Monkv Atvme Ef tepakat holw-
yecakekv, mv holwvke ocan vtothoye tayet omvtes.

Momis Hesaketvmese Eppucet mv en kaketv

holwakan em oh merrvtes. Momet hvlwen a hv-
tapket, momet estuce haket, momen Cesvs kihocvtes.
Momet estemerket arvtes, momet tohweklepkvn oh
estemerket elvtes, Hesaketvmese este en naorketvn
en kpvpyecievret. Hesaketvmeset Atvme Ef tepa-
kan, vlvkvres, kievtes.

Pume Atvme en hopuetakuce toyēs. Momen
Cesvs tohweklepkvn elkvn 'soh estemerrvtes, pum
puyvfekevvn totkv-rakko en kpvvken pun hesahue-
cvret. Cesvs Hesaketvmese Eppuce pu Hesayecvt
omes. Oh vkvsamēt, momet vnokecēn omat, pu
pvsatkof, pum puyvfekevvn hvlwe tvlofvn 'res pum
orvres. Momis oh vkvsvmēkon omat totkv-rakko
en hesahokeko tetayuset omes.

Hvlwe-tvlofv oh vyetv etv sekot omes.

HESAYECV ETV SEKOT OMES.

Cesvs hopuetakuce em merruset omes. Hopue-
takuce em etektvnecatsken, a vc oh vwepekvs, mo-
met 'sen tvcikatskvs, mv omakatet Hesaketvmese
eme tvlofv vpokes, makvtes.

Cesvs oh ayetsken omat, ce hesayecvres, kicets-
kat, Aeha, Hesayecv vn heretskat vn holwvyeckv
omvlkvn vn kpvpyecievsv, momet vm puyvfekevvn vn
hesayecvsv.

ESTE-PAPV.

ESTE-PAPV ponvttv em mekkon kihocet os; yekce
mahet, fekhvmke mahet omekv.

Este-papv ekvvn lekuthan fullēs. Rvkrvket omēs,
momet en nokwv-esse cvpcvket omēs, momet ele-
kususuwv rvkrvket, yekcvket omēs. E cukwv rak-

ket, e nute fvsfvket omēs. Esse oklanet, supvkhvktet hvtvm oklvste tis sases. Este-papv hehkate 'senhonecke mahet omes.

Este-papv nere renayvt omes. Nettv omof cvtohauke, hvfvpan esceyet, ehkaket nucicet omes. Momis neren asosset uewvn oh vpeyet eskaket omēs, eskvkofvt uewv tempen ehkakēs, momen eco, yvnvsv tis esketv eyacet yicof, oh tasket, ayocet elecet pv-pakes.

Este-papv vculof, nute en kvceken yvnvsv pvsateko taves, momet este-lvste eme tvlofv tempen fullet, sukhv, yppefikv tis, este tis ayocakēs. Monkv este tohopke hvlvhwen hahicet, tvlofv em vfulotken ocaket omēs. Vpvlwvt e hute eto yuksvn oh hahicet sasēs, este-papv eto acemecekot omekv.

Cusvlke em ekvnn Cotvne hvtee tempen este-papv svsetvt omes.

Nakcokv-rakko este-papv opunvyece mahet os. Este fekhvmkvke mahe saset este-papv e feken ocaket os, kihocet omes. Este holwvyecvlke este estemerhoyusat, nake svpenkvlecaket, este herakat nake em ahopvnake fullat este-papv nake esvte komet vketece munket ares; mvn es vhopahoyet os. Estekricv pun horre omet este omvlkv holwvyecvlket, momet enhonrkv tis ocekot, eme omkvren komet, este-papv hehket arēs. "Mv omet Este-nekricv este estomen sumecice tayat hopoyet ares," Nakcokv-rakko maket os. Monkv Hesaketvmese emekusvpvkers, Cesvs vrahkvn, heyv holwvyecv puna pum puyvfekv 'svpvke pu sumecice tayat en kvpvken epu'cayecvren.



RVTCE-KUPHE.

HIYOMAT rvtce-kuphe cem ohonayvranvkis. He-
cvs rvtce-kuphe vhake tes.

Rvtce-kuphe nake rakkēt omes. Corakko 'sen
hvlwet omes. Ekv cōtkuset, e nokwv cvpket, kuphe
rakkēt era oh liket omes.

Rvtce-kuphe nak-se-emvnickv heret omes; em
vpeswv hompetv heret omes; e pese esketv heret
omes; esse kapv-hakv es hayetv heret omes.

Rvtce-kuphe kaccv, este-papv tepaket hompetv
eyace elecat ohmekos. Monkos, rvtce-kuphe nettv
omvl' este em vtotkat vtotketv es enhoriyekos.

Rvtce-kuphe pvhen, nak-essen, tvkliken esyoman
hompet omes. Rvtce-kuphe newv eskekis, nettv
cahkepat aret omes.

Este sulket rvtce-kuphe ocaket Alepvlke hocef-

kvts. Rvtce-kuphe hopvye mahen vpeyet omes, momen honnen sapolicet oktahv-rakko 'sete hoyvnehocet omes.

Alepvkke uewv ehylewv eshokkolat sypeyaket omes. Rvtce-kuphe oktahv-rakko oh yvkvpvre ele here en hahoyvtet omes.

Alepvkke estomet oktahv-rakko ete hoyvnekot omēs, rvtce-kuphe heran ocekaten omat.

FUSWV TAFV HERE.

HEYVT fuswv rakke mahat vhaket os. Uehatkv typalvn ekvnv hiyan fullet omes, momen Wahvlv-fvccv ekvnv likan lopuckuset fulles. Rakrvketvt omes, momet rvtce-kuphe omēt, uewv eskekis, hofunen fullet, momet ekvnv oktahan fullet omes. En hvlwe estele-vhopakv palis sases, momet yekevketvt omekv, este hokkolet ohkakis es letkes. En heckv lastuse, hololotcuset omes, momet e tvrpv esse e hvce tepakat hvthicet omes. Esse telēkmuset omes, momen heyv fuswv honhoyetvt omekv, tvmecekot omes. Momis corakko pvfpvne mahat sem pvfpvnet omet, fvccvn ayen omat, naket cvkikekos, momis hoporrenvkekot omet, kololuecet fullen, cakket pvsythoyet omes. Heyv fuswv oktahan korret, em puknvkv hayaket omes, momen sulket em puknvkv hvmkuis etem oh kayaket, echustake pale cahkepen, monkat pale epakis puknvkv hvmkusat vtehet omakes. Echustake estuce ekv en rakke omaket, momet hompetv tis heret omes. E hvrpe lanvket, momet tvkvctvwet omen, uewv es esketv tis hahoyet omes.



Tafv-lvste es fulhoyvnto heyv fuswv e tafvt omes.

Nakcoky-rakko heyv fuswv opunvyecat, "Mvt echustake ekvnnv ofv wiket, momet ëssu ofvn hihoyicet omes, momet elet wokuce tayat, monkat ele-oste tis tvkohlice tayat ehoset omes. Echustake enake toko omecet, vnokecekot omes.

Heyv fuswv hompetv em vlostuset omes, momet hacohakuset omekv, nake estomen em vpvlvthoyis oh tasket loket omës.

Este mvnettvke, vculakis, Este-nekriev em vtot-

kvlke mv fuswv omaket, nake holwvyeckv em vcah-
nat vtekat, oh tasecet omes. Momekv mv fuswv
omaket omes, eto-cvsketv tis, cvto tis, vcopy tis
nokmelaket omakes, cepane okhacusic em vpvlatat
eme es afvcekepat tvlkuse.

 UEKATCV.

UEKATCV nake esherakuset, momis cvpvkhone
tes, Cusvlke em ekvnvhlwe eto vlhekan.

En rakrvke efv rakrakat en rakke omaket omes.
Momis pose omet omes. Pose omet ayopket fulles,
momet etou vcemecet omes. Momet pose cesse
emehakvnto omet, nake emehaket oh tasket, ayocet
omes.

Hesaketvmese owalv Cvlemia em onayvtes.

“Momekv este-papvt eto ofv aosset pvsvtvres,
momen nere yvhvt estemerrvkuecvres, momten ue-
katcv tvlofv vhecicen este estimvt tvlofv ossat vte-
kat lvtahlecvres, en naorketvt sulket ok, momen
pvlke fulecakat ohvtvlaket ayet omekv.” Jer. 5:6.

Momen ahvmkv Cusvlke Hesaketvmese ehosa-
ket, nake vhake emekusvpakof, Hesaketvmese owa-
lvn Hoseyvn ohtotvtes hiyomen nake en kerkuecv-
ranen.

“6 Fvcecakvtes, efeke hvlwecakvtes, momekv vne
cv hosaket omakvtes.

“7 Momekv este-papv em e omecares, uekatcv
omit nene tempen vketecares.

“8 Nokuse echustakuce en cvwhoye omit vnrv-
pares, momet efeke ohrvnkvn lvtvhlecares, momet



mvn lokares este-papv omit; ele-oste honecatet lv-
tvhlecvres." Hos. 13:6, 7, 8.

Uekatev en hocce h̄ruset omes, lane lvslyte es
hoccet omet, hololoteuset omes. Hiyomet en hoccv
cahmeliket omekv, uekatev nake ele-oste emvrah-
kuset omes.

"Este-lvste e hvrpe etice taye haks? momekat
uekatev en tokohle etice taye haks? Mome tayen
omat, ceme take nake holwvke vfvstetv es emunk
hayatskateu nake h̄ren vfvstatske taves." Jer.
13:23.

Pume uekatev tokohle lvslatat uewv 'sem ök-
koseye estomis, en hoccv vslehçēkos. Momis Hesa-
ketvmese en yekcetvt momece tayet omēs. Momekv
nake holwvke vfaste es emunk hayeyet omen omat,
nake here vfvstetv pun yekcet omes. Momekv He-
saketvmese emekusvpraneyet omes, "Feke hvsvt-

ken pun hayet, puyvfekev mehenwvn pum oh mucv-secvren."

Heyvn ce hohsvkates, holwvke fulletvn esker-ratskvten omat, yekce hēren vnrapet wikvranatsket omes. Momatskekon omat, ece 'culakvkofvn holwv-yeckvu ohvtvlaket ayyres, momet etv hakeko wites.

Hesaketvmese mekusvps, momat mvt cem vni-cen, nake holwvke vtekat en homecet, wiket, nake here mehemwe fvece ocan vnokecet, omvlkvn vfvste tayan ce hayvren em'pohvs.

Hesaketvmese Eppuce Cesvs Klist pu Hesayeev em vhakv este omvlkvt, tvlwavlke omvlkvt kerraket vfvstakof nettv heraket omvres. Este omvlkvt Cesvs vnokecaket, emeu etenokecaket omvret okv.

"6 Yvhv yvpelikucen vpokvres, momen uekatev cowatucen em wakkvres; momen wakuce este-papv wakuce-neha etohkvket lumhvres, momen estucet evpyvres.

"7 Wakv nokuse tepaket nanopvres, echustakeu tohkvket lumhvres, momen este-papv wakv-vtotkv omet pvhen pvpvres.

"8 Momen estuce pese-cokusat cetto em vhau-ken oh ahkopvrvres, momen estuce pese-wikusat cetto huden enke oh wvkecvres.

"9 Vm Ekvvn-hvlwe hvsatkusate vtekat ofv na-ket en nokkicekares, momet vhopvnekares. Cehofv ohhoporrenkv uewv uehvtkv ohranat omet, ekvnvn fvcecvret okv." Hesvyv 11:6, 7, 8, 9.

Heyv oketv vlackusat orvranet omes. Este Cesvs vnokecakat heyv nettv hecvranet omes. Yvmv ekv-nvn heyv nake momvranen okvtes, Tvlwv cahmelike Cesvs em opunkv-hervn kerraket, vkvsvmakof horre

wikvres, momet etohkvlket ete'ncakuset fullvres, ete'n hompaket fullvres. Momekv heyvn okvtes, nake 'senhoneckvken svhopayet okvtes. Tvlofv estomet Cesvs em vhakvn vfvstaken omat, estofis heyvt en cakket omes. Hiyome mv opunvkv-herv pohvkeko muñke vpokakat momvkekot omakes, momis ete'n horkopaket, ete pvsvtaket, ete wiyaket komis, momecaket ete'stemerrvkuacet omakes. Nake heyv omakan Cesvs em vhakv vsehet omes. Momekv mvn este kerraket vfvstakof, herkvt vlaket omes.

Momis heyvn vtekusen mv herkv sumket ome-kos. Mv Cesvs oh vkvsvmakvte ena ële estomis, hesahoket emunkvt omvres.

NAORKETV ENKVPVKETV.

Pu feke em munkv holwvket omes, momen pume etawv tat hervken hayeko tetayet omes. Nettv hvmken fvccv heren vkerricet, momet fvccv heren nake celayetvn kometske estomis, momehcetskekos, Hesaketvmeset ce mvnicekon omat. Momen vn hesse toyetskat, Hesaketvmese cen naorketv omvkv en homecet omes. Pu feke holwvhokat estomeceyvr haks? Estomecet mvrahkueceyvre te? Estomet pun naorketv pun kvpvkvr haks? Hesaketvmeset okat, cen naorketvn ce feken es nokkievks, maket omes. Mv momeyat pu 'stemerrihocen, momet nake holwvke tis 'poh vlaket omekv, mv vrahkvn pu feke nokket omes. Efeknokketv yv omat fvccv tokot omes.

Vn hesse toyetskat, efeke-nokketv heyv omat

pum munkv tat ocekot omes, Hesaketvmese em Puyvfekcv Vcakat pum vnicet omekon omat. Momekv Hesaketvmesen Puyvfekcv Hvsvtkat pu'mvren emekusvpraneyet omes. Pun naorketvn vnokeceye munken omat, pun naorketv pun kvpvkeko munkvt omes.

Hesaketvmese emekusapetsken em Puyvfekcvn ece'pyyecicet, heyv nake ce mvhayekvs, momet ce feke holwakat ce hecicet ce kerricekvs, momen, cen naorketv ce hecicen, ce Hesayecvt cen kvpyyecicvren estofis oh hecetske emunkekv.

 CETTO.

WAHVLV Ekvnv Ekvnvfske 'res en hopvyen Ekvnvfske Rakkot ocet omes, Este-cate tvlofvn.

Mvn cetto cvpcvket Estvkwnayv kicetvt fulles. Mv cetto en cvpke estele-vhopakv pale cahkepat 'sen hoyvnet sases. Ena eto en rakke omet omēs. E cukwv rakke mahet omēs, e nute fvsfvket, acopv 'sen rakrvket omēs. E turwv hvyayvhoket omēs.

Mv cetto elawof, nene tempen eton vcemket, lvtcen oh wakkcs, momet wakv, corakko, este tis eto elecvn hoyanof, oh tasiket, wvnahyet, elehcet nokmēles, momet nokmelof hvfypan ehket, nettv sulken wākkēs, mome mvketekof eshechoyen omat, elehocēs, e emvniceko taye hakekv.

Cusvlke em etvlofvn cetto tayent fullvtes.

Cetto ohfvccv nanvke sulken nakcokv-rakko pun kerkuecet os. Momet este naorkvlke mv omvken kicet os. Momet naorkvlke em punvkv mv cetto

este akke en holwvke omēs, kicet os. Eslevlke ekvn-kvrpe tehoyvnecof, Hesaketvmesen vnaorkakvtes. Momen estemerrvkuecvranan cetto totkv omvken, a ohtotvtes akkvkvrnan, momen este sulket pvsatkvtes. Momen mv cetto akkat naket en wiceceko tayen hecakof, Moseskv a oh ahwet, "Naorkēs, momet Hesaketvmese vnrvpen, momet cemeu ece'nrvpen opunahoyes," makakvtes. Hesaketvmese emekusapetsken, heyv cetto pun kvpyecicekvs, makakvtes. Momen Moseskv este em emekusapvtes. Momen Cehofvt Moseskv em punayet, Cetto totkv omen hvys, momet eton ohtvrs: momen ocvres, mv esto cetto akkat vtekat, mvn oh hecof, hesakvres, kicvtes.

Momen Moses cetto vhake cvto-lanen es hayvtes, momet eton ohtarvtes. Momen ocvtes, cetto este estomen akken omat, mv cvto-lane cetton hecof, hesakvtes.

Cesvs Nekotemvse emvhayof, heyv ohonvkvn opunvycvtes, yvmv ekvnv em vtotketv oh hvayicat. Eslevlke mv cetto akkat em wiceceko tayat etvpomen, este estomet em puyvfekev naorketv en kvpiyeciceko tas. Monkv cvto-lane cetto oh hece hesahokvte etvpomen, naorkvlke Cesvs oh hecet, oh vkvsamat hesahokes.

14 "Momen Moseskv vnrvwv ofv cetto kvwapvto etvpomet este Echuswv kvwvpkvrnet os,

15 Oh vkvsamat vtekat estemerkekot, momis hesaketv yuksv-sekon ocvren.

16 Hesaketvmese ekvnv vnokece mahet omekv, eppuce hvmkuse heckuecvte emvtes, mvn estimvt oh vkvsamat estemerkekot, momis hesaketv yuksv-sekon ocvren."



HACKV.

ESTE-HACV toyvkareš, kometsket on omat, momet yvmv ekvnv ce'stemerruset hueret, momet ekvnv hymkeu emeyuksv seko ce sumkvre ce yacekon omat, uehome lvhsetskvs, momet nake este hacece tayat celahyetskvs. Este eskakat vpvke vhrefskvs, momet uehome sasat oh vhyetskvs. Estomuse estomis esiketskvs. Estomusen este esket o estomis, ohvtvlaken esket vyecicen, ohvtvlaken esket vyecicet, este-haco mahhe haket omekv, celvyekot lasekot huervkat tvlkuset, mv nak' esketv homat emvnvttet hueretvt os. Nakcokv-rakkot okat, este horkopvlke, monkat este hacvlket o estomis Hesaketvmese 'metvlofv esceyekos, maket os. Hoktarkv nakvhake-mekusvpkv, porkv, homeckv, eleckv, hacqv, mv nake mv omvke momece sasat vtekat Hesaketvmese' metvlofv escehyekos. "Horkopvlke tis, holacvlke tis, hacvlke tis, tvlke cvlke tis, monkat mvkerrvlke tis, Hesaketvmese me Tvlofv escehyekos." Nakcokv-rakkot maket os.

HOTVLE.

HOTVLEN pohvs! Estimvt hotvle hayvte te? Hesaketvmeset hayvtes. Hotvle momekvs koman hotalet, momet momekvs komofvn fekhonnet omēs. Vnehkvn hotvle hehecvko tis, estvmivlkis vm vfolotet hotalet omes. Mvtypomen Hesaketvmese nak' omvlkvn hecet kerret omēs. Ahuyiret vn topvn en kvpakvyat cv heces, vtotkvranit, monkat ahkopvnraret ayvyat cv hecet, hvtvm wakkvyat cv hecēs. Hesaketvmese nake estomvyat omvlkvn kerret on omat, nake makvyat kērres. Aeha, opunkv holwahoken opunayit, momet vretv holwvken arin omat, Hesaketvmese vc vnokecekares.

Ps. 139:1. "Cehofv toyetskat, vc ofvn cv hopoyet, cv kerretskes.

2 Likit, hvtvm a huervyis cv kerretskes, vm vkerrickv hopvye tis kerretskes.

3 Vn nene, momen vn wakketv tis vm vfolotet, momen vm vretv omvlkvn vn kerretsket os.

4 Cehofv toyetskat, opunkv cv tulaswv vtehkat kerretskeko sahsekot ok, omvlkvn kerretsket omes.

5 Cv yvpvt ot, cv homv tis, vm vfolotetskvttet omes.

6 Nake kerretv *heyv omat* estomahet, vc ohfvnkes; hvlwet omes, mv *oretv* estohmvkos.

7 Estvmvn ahyit, cem Puyvfekv en kvpvkar haks, hvtvm estvmvn vletkit, cen renakv en kvpvkār haks?

8 Kvwvpikit hvlwe-tvlofvn eceyvyis, mvn liketskes; totkv-rakko ofvn vn topv hayvye estomis, hecvs, liketskes.

9 Hvthvyvtke e tvrpnv ocit ayit, uehvtkv hopvyv mahen likvyisem;

10 Mvt o estomis cenket cv yvpvyvres, momen cenkvpervt cv hvlvtvres.

11 Mehenwvn yomucket vc vyokkofvres, makin omat, nere tis hvyayvket vm vfolotet omvres.

12 Henka, yomucke naken cem ehhekos, momis nettv omet nere hvyayvket omes; yomucke momen hvyayvke tepakat momvlkuset *os ce homv*.

23 Vc ofvn cv hopoyvs, Hesaketvmese, momet cv feken kerrvs, vc ohfvcecvvs, momet vm vkerrickvn kerrvs.

24 Momet hecvvs, vretv holwvke vc vpiken omat, momen vyetv emeyuksv sekou cv yvpayet '*svc vyvs*.'

KE-RAKKO EM VPE.

6 CESVT heyv opunvkv-svhopakvn es ete'm punayvtes. "Este-hunvnwv hvmket ke-rakkon eme cvpofv ofvn vhocet ocvtes. Emet ylaket, momet em etten vhopoyvtes, momet sekou hecvtes.

7 Momof eme cvpofv-vfastvn kievtes, Hecvvs, heyv ohrolope tutcenat heyv ke-rakko em ette vhopoyvyat vlakit omis, momet sekou hecis. Tvcvs, estomen ekvnvn yvmahke haks?

8 Momen emet em vyoposket kievtes, Pucase, heyv ohrolopen hvtvm wikvs, vnakvn korrit, vlekwi-cares.

9 Momen em ette hayen omat *heres*, momen monkon omat, mv eryupvn tacetskvres."

Vn hesse, cemet ke-rakko Hesaketvmese eme



evpoivn hueret ometskes. Momen Hesaketvmese evpofv Pucase tes. Mvt yvmv ekvnv ofv ce huericet omen, opunvkv-herv vhesaketv Cesvs es vlakvte pohet ometskes. Ohrolope omvlkvv Hesaketvmese fvccetv em etten hayetskvren cem etektvnecet omes. Heyv ohrolopet es cen poke tis omepēs. Heyv nakcokucet espoke em penkvke ofv hueretskat, ce mvhayat tis omepēs. Momet omekv, oketv cem etektvnke munkōf, mekusapv hakvs; mometsken omat, nettv espoket vlakof, ece'fvecke tares.

NETTV ESPOKE.

CESVS estvn hiyomat like te? Hesaketvmese em akvpervn likes, momis pu heces, ekvnv oh fulleyat. Mekusapeyat pum pohes, epu'nokecet, pum emekusapet omes. Cesvs yvmv ekvnv hvtvm vlakvr haks? Henka! hvtvm 'rvlvkvres nettv espoke omof, ekvnv ohfvcccvranet.

Estuce 'stemerkuse hotosuse ont, hvtvm 'rvlvh-kekos. Hvtvm 'rvlaket yekcetv, afvcketv rakken ocet vlvkvres. Nettv espoke omof, em estvlke vca-cakat vpaken vlvkvres, momof em afvcketv aheckue-cvres, haketv hakof. Momen este-hopelkv omvlkv't en haukvkvres, momen omvlkv't pvsvtkakvte e hom-vn svpvklvres. Cemeu nettv espoke rakkat omof, aretskvres, momof ekvnnv totkv'es nokrvres, momen, sutv holattat omvlkv't sumkvres. Mv nettv rakkat omof, Cesvt este em puyvfekev omvlkv'n ohfvcecvres. Momis estimvt vnokecv't on omat, kievres, "Eceyvs cen Hesaketvmese em afvcketv ofvn." Momis vnokecv'kekate, momet holwvyecakvte totkv-rakkon vk hvtvpecvrane, nettv espoke orof. Cevsvocekv eteropotten Hesaketvmese emekusvpvks. Hiyomofvn vkvsvmatsket on omat, cem puyvfekev hesakvres makvtet os.

Cane en Kerkueckv 20:11. "Momen mekko-em-ohliketv rakke hvtken hecvyvns, momet oh likateu; mv ehomvn ekvnnv hvlwe esyomat em vkueyevns, momen estvmvn fekhonne tayat sekvnses.

12 Momen pvsvtkat lopockuse rakrvke esyomat Hesaketvmese ehomvn svpaklen hecvyvns; momen nakcokv en hauhakvns. Momen nakcokv etvt en haukvns, mvt hesaketv nakcokvt; momen pvsvtkat mv nakcokv es cokvte aossen ohfvccakvns em vtotketv take vcvkvyen.

13 Momen uehvtkv pvsvtke vk ocvte a wkvns, momen elkv totkv-rakko tepakat pvsvtke ocakvte a wvakvns, momen este vtekat em vtotketv take vcvkvyen ohfvccakvns.

14 Momen elkv totkv-rakko tepakat vkhvse-

rakko totkvn vk pvlatkvnks; heyvt elkv svhokkolat tes.

15 Momen estimvto estomet nakeokv hesake ofvn es hoccekon omat, vkhvse-rakko totkvn vk pvlatkvtes."

Cane en Kerkueckv 21:10. "Puyvfekev ofvn cv vpahyet, ekvnhvlwe rakke mahen 'res vc vcemiket, mv tvlofv rakkat cv hecicvnks, Celuslyme tvlofv vca-kat hvlwen a hvtapken Hesaketvmese a en kvpaket.

11 Hesaketvmese en hvyayvke ocet, momen en hvyayvket cvto vcake mahat, momet cvto caspv omet, estakheckv en hvyayvke omet.

18 Momen mv em vtahopke caspv es hayvkvttet, momen etvlwv cvtokunaplane mvketeket, estakheckv en hvyayvke omet omvnks.

22 Momen emekusvpkv-cuko mv ofv hecvkvns, Cehofv Hesaketvmese, yekcetv omvlecat, momen Yvpefikucet emekusvpkv-cukot omekv.

23 Momen mv etvlwv hvse, monkat hvresse tepakat ofv hvyayicvre eyacekot oh hvyayicekot omvnks. Hesaketvmese en hvyayvket oh hvyayicet omekv, momen yvpefikucet mv en hvyayvket omekv.

24 Momen Tvlwvvlke hesahokat en hvyayvke ofvn yvkvpkvres.

4 Momen Hesaketvmeset eturopuswv eturwv en hvsvthicvres, momen efeknokketv, hvkihkety, elkv tis svnvcomv sekares, nake en homv ocvnke eshojv-nepekv.

25 Momen *tohopke* em vhauke nettv estofis vk-hotkvyte sekares, nere sekot omekv.

27 Momen nake esvholwvyecat, estomet eceyeko tayet omvres. Monkat holwvke este laksvlke vtot-

kat, monkat lvksetv hayat, holwvyecvlke esceyekos,
 momis Yvpefikuce en nakcokv hesake 'soh cokakat
 esceyvres."

HESAKETVMESE ESTOMIS HVMECICET OMES.

1. NERE yomucke herat tis,
 Hvmket arvyat hece haks?
 Henka, Hesaketvmeset
 Neren nettv omen heces.
2. Eturwv omvl' nucicof,
 Este vm vnvttcekat,
 Nak' mecetvn komvyate,
 Mvn momecvko taye haks?
3. Hekos, Hesaketvmese
 Est' vketece munkvt os.
 Est' em puyvfekev omvl'
 Mvt heren kerre munkvt os.
4. Vnrwv este vrvte
 Sekan 'rorit, mvn ehkvyis,
 Mvt o estomis vn tvlkeks
 Cehofvt vm afolotes.
5. Hvlwen afvcket liket os,
 Totkv-rakko tis hecet os,
 Estomis hvmeccicet os.
 'Stomen en letkvko taves.
6. Momis letkvye tayet os,
 'Stvn vyetvn cv kerrices,
 Cesvn oh letkvs, cv kices,
 Heren vc vcayecvres.

HOPORRENKV PUNVKV.

1:5 ESTE hoporrenat pohet, nakkerretv ohvtv-layes.

1:17 Cehofv em penkvkvvt hoporrenkv vliceckvt omes; momis este hoporrenvkekat hoporrenkv herat, momet nake emvahoyat em vlostekot omes.

2:6 Cehofvt hoporrenkv herat emet omekv.

3:5 Cehofvn vfekrvkkvs ce feke 'somvlkv.

3:7 Cehofvn em penkalet, holwakan en kvpv-kvs.

4:14 Este holwvyecv en nene vpihketskvs, momet este holwvyecvlke em vpeyetv vhyetskvs.

4:23 Ce feken omvlkv vketecet, vcvyeevs, mv aossen hesaketvt omekv.

10:12 Holvckvt etehvnkv hayet omes; momis vnokeckvt holwvyeckv omvlkvn ohranet omes.

10:23 Este hoporrenekat naorketvt es em afvketvt omes; momis este-hunvnwv nak' kerrat hoporrenkv ocet omes.

12:19 Cukhvrpe faccat estofis oce munkv tares, momis etulaswv laksat vkocoknusen omes.

14:9 Hoporrenvkekat naorketv nak' hayakekot omēs.

15:3 Cehofv e turwv hvmeccet omes, holwakat, momet herat hecet omes.

16:18 Ekvsvmkvt sumketv ehomvn ayet omes.

16:28 Este-hunvnwv holwvyecv etehvnkv aho-cet omes, momen *este* en wvswakvt eten hessvlke rakrvken etekvpicet omes.

20:4 Hopuewuce tis nake vfastat es kerket omēs, em vtotketv hvsvtke tat, momen fvccv tat.

20:13 Nuckv vnokehceetskvs, estemerkv em vlah-ke witetskes; ce turwvn en hvweevs, momen tvklike cem etetayvres.

22:6 Hopuewuce vye tayan emvhayat vfvstv, momen emet vculis emet en kvpahkekos.

SATKV.

NAKCKV here oh onvyeyvre vrahkv, satkv cokv ofv ocat vtekat omvlkv kerrvraneyet omes.

Lvtv etohkvkat punvkv hayet omes.

Punvkv etohkvkat svntvns hayet omes.

, Heyv satkv kame kicetvt omes, momen *a* maketv en hofune omen fekhonnetvt omes.

; Heyv satkv semvkolvn kicetvt omes, momen *a a* maketv en hofune omen fekhonnetvt omes.

: Heyv satkv kolvn kicetvt omes, momen *a a a* maketv en hofune omen fekhonnetvt omes.

. Heyv satkv pelevt kicetvt omes, momen *a a a a* maketv en hofune omen fekhonnetvt omes.

— Heyv satkv tas kicetvt omes, vhofune fekhonnetvt omes.

- Heyv satkv hifen kicetvt omes. Heyv satkv opunvkv hokkolen etenrvwn ocet omes, hvmket opunvkv es wakke hvmke eyuksvt on, hvmkat enhvteceskv on omat, momet opunvkv hokkolen etehvltet hvmkusen hayet omes. Hiyome, svtr-rakko.

' Heyv satkv cokv, monkat lvtv hvmket sekaterkuecet omes. Hiyome, nak'.

“ ” Heyv satkv opunvkv cokv etv aosse tat eskerkv opunvkv eslikv ehomvn eyuksvn tepaken ocet

omes. Monkat este tis ete'm punahoyen omat, este nak' makat vtekat enhvteceskvn eyuksvn tepaken ocet omes.

! Heyv satkv opunkv, monkat svntvns eyuksvn ocet omes; vkerrickv ayvkhvmkv eskerkv, momet hvvm vhofune fekhonnetv eskerkv omes.

? Heyv satkv nake vpohetv eskerkv omes.

& Heyv momet, monkat momen maketvt omes.

&c Heyv momen vplwv maketvt omes.

() Heyv satkv opunkv etenrvwn svsekket omes; opunkv vplwn kerkuecet omes.

* † ‡ Heyv satkv, heyv cokv elecvn naket ocat eskerket omes.


Svntvns vliceetv, momen este hocfkv, etlvwv hocfkv, hvse hocfkv lvtv rakkaten ehomvn licetvt omes. Hiyome, Cane, Rekackv, Uecate, Hvyuce, &c.

Coyetv kerretv ekvnv oktahan tpeksvhcet etokvcken es coyetvt heret omes.

ERKE EPPUCETAKEU.

CEPVNVKE hokkolet welakvtes, eckvlke emekusapvlket omet, enake ocvket omvtes. Momen heyv cepvnvke escvleckv-pvfnv vtehkvt welvketvn eyacvke tates, Nettv-Fekepkvn, momis eckvlket em vkvsvmekates.

Estvtis welvkeket kaken Nettv-Fekepkv orekv, Nettv-Fekepkv estomis escvleckv vtehkvt welvkeye taves makaket omis, eckvlket en komeko tetayvtes. Erke vhakv esostan vkerricat, Vntvlkuset Hesaketvmese en nettv vcayecvranin okekates. Momis



evppucetake, evchustvlke, vm vtotkv-hunvnwv, vtotkv-hokte tis, momen vm wakvlke tis, mv nettv fekv-pvranen okvtes, komvtes.

Momekv en cepvnvke nake em 'pohakat em apohicvkekates. Momusen evpvkhokvtes, momet pume komeyat welakeyvres komakvtes. Momusen uehvtkv perro vk etefullan vhoyepvtes.

Momen sumhokateh, erkenkv, Cane Kefen kihocet, uehvtkv afopke like tatet on, mvn en kerkuehocvtes, hopoyet, eshecen omat afulhuecetvn komvren kihocvtes. Momekv hopoyet aret, perro 'mehake este vpokan kaken eshecvtes. Momusen ete'm punayvtes, "Fulhokatskat mit cen hervke tayet os," kicet, momis ehvperkv'n punayvtes. Nake komakat mit 'sohfvckvren vyekcvke tates. Momekv heyv erkenkvv opunkvv herakuse 'sem punayat Momen oks komaket omis, Mohmeyetvn okhos komvkekates. Yefulhokepvre komat em vcahne munkvtes. "Ceckvlke em vkerrickv em vhopanuset seho-

ket omatskes," kievtes. "Vkerrihevkes," erkenkvvt kievtes, "Cecketake ece 'hecievket, cem emekusapvken, ohrolope sulket hoyanes. Momen hiyomat em vtotketv tate sohfvcken es afvckvkvrantv munkan, estemerkv min e oh vlvkuecatsken hecat, estemerkv rakke mahen cecke mahkvvu en heckuecet omatskes, kievtes. Nake 'se naorickv sulke estvma-hen ec oh sumecievket omat, en feketv hiyomen es em feket omatskes," kievtes.

Hvmmaket ete'm punayof esmynnettusat, Mon okhos, kont, momusen efeke en kafken hvkihkvtes. "Tayen vm mvtet huerit omvyvtet kerris, momen cv feke vm vhopanus" makvtes. Momet fulkepetv ykvsamusvtes.

Momis 'svculicusat vyetv vyeke here munkvtes, opunkv herakuse 'sem punayet estomehoceko tayvtes. "Escvlleckuce vm encahokvnks, momen uehvt-kvn vyetv komvyvnkekv, vyvranvyat tvlkus," makvtes. Momet, "Vnen ve vevk vtes, cv hutén, momen perro-cuko tis vpikit, este somusis vretske tayen cen heckuecares" kicet omis, momeko tayvtes. "Cvc-kvlket perro-oh-vtotkvke ont sumkvns cv komvkvren komikv, perro-oh-vtotkvke omet vyepares," makvtes. "Momet cem vkerriekvt on omat, vyvnos ce," erkenkvvt kievtes. "Hesaketvmese ce 'pakvres ce kicet omis, cen naorketv tat ce cakke ocvres. Momen Hesaketvmeset cen naorketv esvrahkvén ec oh fvccecvres," kicet, momusen en kvpakvtes.

Momis e cuse tat eckvlken ohfulkepvtes. Momis e rvhv estvn ayat kerkekok' estvn elepvtes, komhoyvtes.

Momvte hofune hakof, mv erkenkvvt vháuken a

em vnafke sasen pohvtes. Momet, vhauke hvwechoyen, este perro aosset aret ohmvten hecvtes, momen ete'm punayat, "Este mvnette hvmket elehocvranen liket, ce hecetvn eyacet on, arit omis," kicvtes. "Mvn hecvkon omat, vc afackuset cv 'leko tetayes," maket okes, kicvtes.

Hofunusekon erkenkvv perro-cuko vk likan 'rorvtes, mont heyv este mvnettat vhecihocen liken hecet omis, kerrekot, "Vn hesse toyetskat, cen cv merrus, momis ce kerrvye sekokv, estomen vn huehket oketskat kerretvn cv yaces," kicvtes.

"Potse tvlofvn erkenkvvye tvnkekv, momof cv hecetskvv haks?" "Monks, erkenaketske pohvyvte sekos." "Monkv cv kerretske seko haks"? kicvtes. "Ce kerrvks, erkenvka," makvtes. "Hofunof cepv-nvke hokkolet sumhoket welaken eshecet, Fulhokepvks ceckvlke kakan kicet, fulhuecetv komet, em vcahnetske ocekat haks"? kicvtes. "Mucv kerris" kicvtes. "Monkv, heyv cen huehkvvyat, espoken ce te'm punayit, nake 'svn hervren vc ohtohketske cem apohicvko ocvte vtekat, nake vne 'svn hervren vc ohtohketske, cem apohicvko ocvte vtekat, nake vne 'svn hervren oketskvten mucv kerrit, cen kerkuehcet, cen kvpvketvn komit, cen huehket okis," makvtes. "Nake v'mvhayetskvvna cem apohicvyvte! Momis hiyomat vkerricit estohmvkos. Oketv hoyvneps. Vn naorketvt mucv es cv heces. Hesake-tvmeset vc ohfvcecet os. Momen, Cv hute vc vevk vyvs cv kicetsket omis, cem apohicvkot, momen cv hocefkv tis etvn hahyit ayvyvntat, hiyomat este vm merrvre sekon, este cv kerre sekon, cv'lvrant os," makvtes. Momusen erkenkvv Kefen, e feke es nok-

kicuset, vpaket em emekusapvtes, momet em vcahnvtes.

Momen momusen oh vkhottephohyen, erkenvkv kypetvnen te'm punayvtes, "Heyv este mvnette estemerkat estomet hesakeko taye haks"? kievtes. "Estont hesakeko tetayuset os, mekkvke vhakv hayat, Estimvt heyv naorketv momecen omat, elvres, maketvt omepe tvnken, mv mahusan e oh wikepet omepekv, estohmet hesake tayat kerrëskot os," makvtes. "Momekv hiyomat nakcokv en nene hecet vpoket omes, elecvraneyat," makvtes.

Erkenvkv, Momis Lvntvn tvlofvn vhyit mekkvlke er vhuyirit ete'm punayvyit, hecares, komët ayvtes. Monk v mekkvlke hvmke ehomvn er oret en kerkuecvtes. "Mv este mvnettät en nakvlke tis em onayat estomet hesake tayen omat kerretvn komit arit omis," makvtes. Momis mekko opunvkv em ayoposket, "Elvrannen nakcokv ayeciceye hoyvnepekv, estome tayat kerrepvks ce, momis nvkvftvrane kv, nake kerkuecetskat kerkuecin, mekko-rakkat pohvres, momen hesayece tayen omat, pohetskvres," kievtes.

Momen erkenvkv 'rvtepët 'rvlakan mv nettvn mv este elehocvrannen pohvtes. Momekv lvpkusen mekko em punvkv vlvkekon omat, hesayecen ome estomis, elvrangat tvlkusvtes, oketvt vlvkepekv.

Momet erkenvkv perro oh ayet 'roran, este vculet, efeke en nokkusen, hvkihtet, perro en kvpaket ayen hecvtes. Momat mv este cepanat erket ohmvten kerrvtes, espoke eppuce ete'm punayet vsetet en kvpaket omvtes. Hesaketvmese em penkvlvkt mvnettuse tvwv evpvye mekusvpkv-cuko 'soh aye

'sarvnnat aret omvtes. Momen en sumikof tis, 'sv-rahkv em emekusapvtes, "Hesaketvmese, Estvmvn cvppuce are haks"? maket, momet hiyomat eshecet omes, svnvcomv teheceko tayet te'n kvpvkvrant tehecvtes. Momusen perro wiket omvtes.

Momis erkenvkv perro 'receyan, elecvrant metetakuehocen 'rorvtes, momusen este mvnnettatt yvmv ekvnv en kvpahket, Hesaketvmese ehomv er hue-rvranat vwolicusvtes. Momis hiyome mvketekof hesakvre mekko em punkv pohiken, hesakvtes, momet nettv sulken erkvke er vpvkepvtes.

Heyv este mvnnettatt erkenvkv ete'm punayan em apohicet, e cusen vcvk fulkvten omat, efeknokketv momvtekat eckvlke oh cvkkuecekvnt os, momet emeu nake holwvke momat e oh cvkkuecekvnt os.

Este mvnettvlke nake kihocat apohicekot, nak' herekis e en cakkuecet omēs.

HOKTUCE ENOKKAT.

Mv hoktuce hecetska? Henka, hecis. Enokket ot en topvn oh wakket omes. Ecket em vtvkhvken likes. Momis e'mvniceko tetayus. Cemehkv, mv hoktuce em vnicetske tetaya? Hekos, estimvt e'mvniceko taves. Hesaketvmese tulkuset momece tetaves.

Cemet ce nokken, vneu cv nokken, omvlkeyatet pu nokhoket, hofunekon pu pvsvtke tetayet omes.

Momof pun hesse pucke 'sen yekcat pu yacvres, elkv eteropotteyof, epu 'pakvren Pun hesse mvn momece tayat oce te? Henka, oces. Momis fuccvn hopoyēkon omat, eshehcēkos.



HORKOPKV.

“HORKOHPETSKVS,”—vhakv escenvpakat. “Mv horkopvte huerat svnvcomv horkohpats.” Hoŕkopetv naorketv rakke mahet os. Horkopv, Hesaketvmeseme vhakvn, momet este em vhakvn kacet os.

Nake est'enake tokon, est'em esvkatet horkopkvts, momet eheth licvkat kvhakuce en rakke omusis esvkatet horkopkvts, momet corakko en rakke omvtekis, momet cvtokunawv rakken licephoyis, e pucase kerrekof cawvkatet horkopkvts.

Momen este horkopv en yekcen 'sest' ohfvnkvn-tot, nake sestvpenkvlecat sases. Mvu horkopkvts. Momen hvtvm horkopv este elecvtot, nake en cawet os. Mvu horkopkvts.

Momen hvtvm estome Hesaketvmese em vhakv en kvceye tayat ocet os. Naket punake tokot sum-

ket liken eshecet, ehset, e pucasen yoh fulecicekot, ehên omat horkopvlke toyēs.

Este sulket omes, cokv tis esvhkopanet, monkat corakko tis 'temvrecet, cvtokunawv ete'n horkopakos. Monkat nake enake tokat tis cvnakets maket, tayen laksaket os, momen est'emvkerret, nake esaken omat, horkopaket os.

Momen hvttm este nake wiyet en rahkvn rakke mahen, momvteke oreko estomis, wiyaket es est'em vlakset, horkopvlke haket os.

Momen hvttm este nake est'em vcayecvrannen en wihokof vcayecekot, este'n yvmahkuecet vfvstekon omat, este'n horkope etetayuset os. Momen este enhorre, es e mvnicekat naorket os. Oketv mome yvmahkuecettv tokot os. Oketv vaket os; monkv estefvccv huerepet oketv fvccvn yvmahkuecekon omat, afackuset os. Momet Hesaketvmesen afvceccicet os.

"Mv horkopvte huerat svnvcomvn horkohpats, momis vtotkekvs, momet nake heran enken 'svtotkekvs, este nake enkusvpkan emettv em etetayvret." Ef. 4:28.

Horkopkv vtekat Hesaketvmese en homecet os. Horkopvlke momen laksvlkeu em vkerrickvn eticet Hesaketvmese oh fulecekon omat, omvkvtt estemerkvkvranet os.

"Momof mome tares, naoriket omvtet ok, nake sestvpenkvlecat, monkat este mvkerre nake heckuecat, monkat nake este'm vcayecvrane em wihokvte, monkat mv nake sumke eshecet est' oh fulecicvres." Lef. 6:4.



YUPO-YVPE.

NAKE hecetu mvtawvt holwaket heyvn hueres. Yupo-yvpēt omes. En rakke tat yupo-lowake en rakke en nvrkvpv oret omes, momis e yupo cvpke vtvrekot omet, cukhvrponvpvt cvpket omes, momet yupo-lowake enute-fvske ocat onkot, yupo onvpvn yvpen ocet omes. Hvmkuis, hvtvm hokkolis ocvket omes, heyvt ocē hecatskat omet. E hvcko lvpotlvket oh cvkcvhet omes, momet ele-wesakv tutcenet omes. E hvrpe tvlvswē, cekfet omet, tokfelv mvketeke, momet setekelket omes. Re estomet e hvrpe eteropotteko tayet omes.

Yupo-yvpe Wahvlv ekvnv lekutlēhan fullet omēs, momet nake lane ekvnv hontan hompes, pvhe tis, momet etolvtee tis, momet em fulletv sukhv omet omes.

Cvpakken omat, holwvyecvketv mahet omes, ekvnv tis e yvpen es copenet, letket kololuecet arēs.

Fayvlket, elecetvn komen omat, e turwvn 'sen hēcuset echet omes, mvn en rahvkat tvlkuset elecvke tayet omēkv.

Cvpvkktv en heretvt omet, cvpvkke omet, sen-honeckvket omes. Este-fayv mahhe hvmket opunayat, "Yupo-yype cvpvkke etenrvpvko munket, este-papv pale cahkepis mimvn etenrvpvye taves," makvtes. Momis vntat nake ponvttv honecakat es-tomis vwolicetv cv yacekot omis, momet ekvnv nake momvke seko likepvyat mit vn heret vc afvcket omes.



CVPOFUCE.

ESTE em vkerrickv cvpofuce omet os, momekv vhericet vfvstetvt os. Cvpofucehkv nake enerkv heren vhochoyekon omat, nake em ette herakat,

pvkpvke herakusat tis mv ofv sekot omes. Momekv cepvkvke, hoklusvke esyome cokv-heckv vpeyen omat, emvhayvlke emvhayat enerkv heran em vkerickvn em oh vhocet os. Momen vkerrickv holwahokat, momen opunkv holwahokat, este holwahokatet vtvkrv honte oh svkwecat tes. Heyv vtvkrv vhochoyekis hontet omes, momet estomehocekon omat, pvfnet mahet, nake vhockv herakan ohfvnket, vhopanes.

Momekv herakatet cem mvhmaykvren ce yacvket on omat, nake herakaten hericet vketecet, vkerrickv holwahokan lemet vpvlvtvkes, nak' vhocucen en lemvkvnto etvpomen.

Hesaketvmese em enhonrv heyv etehoyvnen momecetvn komatsket on omat, ce hoporrenvke tat ece 'fackuskvres.

HEKOS MAKETVN KERRVS.

HEKOS maketv opunkv cōtkušet omet omis, vrakkuecvkvre tayes. Momekv este Hekos maketvn 'semunk hayet on omat, estemerkv tis efeknokketv tis, monkat nake en yvmahke tayate tis em momekon hueret omes.

Momekv este nake naorketv tis est'oh yekcice wites, monkat vtotkepvraneyvte tis, oketv yvmahkusat welykvkets este pu kice wites; momof Hekos kicvraneyet os. Momekv este pum etohkvketvt cokv-heckv ofv tis, monkat mekusvpkv ofv tis Wv-waket, vhekopvkvkets pu kicen omat, Hekos kicvraneyet os. Momet opunkv holwahoke tis es opun-

ahoyeyvren este pu komet o estomis, Hesaketvmeset pum opunvkv omvlkvñ pohet omat kerrēt, Hekos makvraneyet os.

Este pum etohkvkety puckvlke tis, monkat pu mvhayvlke tis em apohicēkot, monkat pum etvlwv em vhakv tis kvceyvren, estet pu komet o estomis, pu fekhvmkuset Hekos makvraneyet os.

Nettvcaakon kvceyvren ep ohyekcihoce estomis, Hekos makvraneyet os.

Nake tis naoriket are witēn, lvkiset ohrvnvs pu kihoce estomis, “Hekos, estofis fvccvn oponayvyet omvres” makeyan heres. Nake cōtkuset, rakket o estomis punake tokon eseyvren pu komet ep ohyekcihoce estomis, Hesaketvmeset pu hece munkvt omat kerrēt, “Hekos, este horkvpv toyvkares” makvraneyet os.

Uehomen, momet nake este hacece tayen eskeyvren pu komhoyet omen omat, Hekos makvraneyet os. Momet opvnkv tis, pukkechetv tis, posketv tis, corakko setemvrkv tis, cokv-vhkopvnkv tis, monkat uehome eskety sasat tis vpeyeyvren pu komhoye estomis, Hekos makvraneyet os.

Estofis este vpvltake nake holwake vfvsteyvren pu komet omes, momet ep ohyekcice wites. Momet o estomis, pu fekhvmkuset Hekos kicet em vyvposkvraneyet os.

Nake holwvke vtekan Hekos maketvn kerreyet on omat, efeknokketv tis nake empenkvke sulken en kvpvket svpvkleyēs.

HVLWE-TVLOFV.

* VN hesse, ce 'tem punvyvanis. Cv feke vhetke tetaye cem puyvfekev cem vnokeevyat, momet hesakepat ce komvyat ohfveevt nak' vpohkvn cem 'pohvanis. Cen naorketv cen kypaket o haks? Cesvs pu Hesayecv ofvn hueretsket o haks? Svnvcomv heketsket o haks? Yvpefikuce e catvn 'sec okkosket o haks? Heyvn ce monkot omen omat, nak' eti estometske estomis, momet nake estomen ocetske estomis, estohmet estofvn hvlwe-tvlofv er ohretskekos.

Pu Hesayecv vnokecusat hvmmaket omes; "Este svnvcomvn heket omekon omat, Hesaketvmese 'metvlofv hehcekos." Em atevke yvpefikuce e catvn 'sokkosket hathakuse hakat Hesaketvmese em ohliketv ehomv 'roricvres.

Eknv hvmet on omat, liketv hokkolet omes, hvlwe-tvlofv, Este-nekriev hutentepakuset omes. Heyv hvmetekan emeyuksv-sekon likvranetskes. Estomahes! Heyvn vkerricvs, estvmi tar haks? Hvlwe-tvlofv etektvinkuset os. Hesaketvmese Epucet fekvttet os, cevranetskat. Hesaketvmese em Puyvfekev Hvsatkusat, estofis ce Hesayecv ohvtepet em etetakepvs ce kice munkvt os.

Hesaketvmese em estvlke, momen puyvfekev vfackakusat Hvlwe-tvlofv ayepetskvren eyacakuset os. Este herake hvsvthvke yvmv ekvnv sasat vtekat cem vpyecet os. Hvlwe tvlofv em vhauke ceme tat ē emvkhottiye witetskes.

Nak' estometskar haks? Nake hvmet hvlwe-tvlofv cevte ce mvnvtece tayet os, vkvsvmkv ce

Hesayecv vfekrakketv ocetskekate. Hesaketvmese Eppuce oh vkvsametskat, hesaketv yuksv-sekon ocetskvres, momen mvn oh vkvsametskekon omat, estemerkv yuksv-sekon ce 'stemerkvres. Hesaketvmese yvmv ekvnv vnokecat rakket omekv, Eppuce vnokēcusat atotvtes, momekv estimvt oh vkvsamen omat, estemeriye kos. Hesaketv yuksv-sekon hesakvres. Hesaketvmese Eppuce ekvnv sumecivranen atotet omekates, pu hesahokvre vrahkvn omvtes.

UEHOME-ESKV.

HEYV este huerat hecetska? Naken eset oma? Enke pvlhvmken fvlaskon 'seset, pvlhvmken halon 'seset, uehomen esket os. Heren e kv-essen, e turwvn, e turofvn, em atcvken, en holwvketv omvlkvn en hehcvs. Nake oma? Tayen e estemerricet hue ret os. Hvte uehome eskeko huerof, en heckv herusvtes. Momis hiyomat tan nake omat kerrvks. Hace mahet este penkvlece ont hueret os.

Mvnettv lke, en heckvn vlosticvketvt omvnts. Momen em vpvltaket hecof, vrakkuecvke taren eyacvket omes. E turofv, em atcvke tis, en heckv omvlkvt hervren eyacvket os. Momis este en heckv herusvte tis, uehome-eskv haken omat, momusen omvlkvt en sumket os. E turwvt vkcataken, e turofvu eleske ome en haken, e kv-esse tis, e turofvn a oh pvlatken, em atcvkeu omvlkvt en lesehvkepen, este onko haket os. Momen este herake fullat vpake vretv eyahcekos, vlesketvn este'n hayvranekv. En hessvlkeu omvlkvt en kvpykaket os. Ha-



cet vlaken omat, hoktvken em penkvlaket em pefatket os. Momof e hiwv, en hopuetakeu, naken ocekot estemerket tvk vpoket os, uehome esketvt ome-cicen, cvtokunawv omvlkvt pokepekv.

Uehome celayetv penkvket os. Mv este este-penkvlece hueran hehevs! Heren hecv! Uehome wiyvlke opunahoyat pohvyet os. Hecen vpayvkofvn este-catvlke em vloste mahats, makaket os. Hece entvlkuis este-hacecekv, uehomen vpakofsvhere mahecet os. Este-cate uehome en cvmpe mahet omen kerris. Uehome neset esken, cvtoku-

nawvt pokepof, momusen corakko tis este'm ohonayet os, monkat wakv tis sukhv tis, hacē, cen onkv, omvkvvt pokepis, Estohkos, maket os. Hacvlke cuehvrانuset, nene-cvpv tis wakken, hechoyet os.

Uehome-eskv eliwv ocekan herēs, enhvperkvn tayen hokte hervte tis estemerricet onkv. *Heyv cokv hayvyat, opunvkv fvccvt os, momen hoporrenkvn 'se emvahoyekvs komit omis.* Hesaketvmese este en heckv here hayvte hiyome e estemerricat fvccv te? Fvccvronkot os. Mv vhakv, "Elehcetskvs" make ocat, este electv vsehat etvpomen, puna momecet, elecvrانēkon pum vsehet os. Uehomet este sulke mahen pvsvtvtet omes. Estet etelecvcuks mahoken pohēn omat, uehomet omecicvcuken poheyat sulket os. Mv tvlkusis en holwvketv pum onayet os. "Hesaketvmese en cuko-vcakat toyatskat, momen Hesaketvmese em Puyvfekv Vcakatet ec ofvn vpike tat kerratskeko haks"? Cokv-rakko pu kicet os. Monkv Hesaketvmese em Puyvfekvt epu 'piket onkv, puna vcayecvrانeyet omes. Uehome-eskv ena vcayecekot os. Uehomen tayen eskof, envcofvn em vhopanen, elet os. Momen mv tvlkeket os. Este hace ēlat Hesaketvmese em etvlofv cehyekos, momis totkv-rakkon vk hvtvpkvrانet os. Monkv vn hessvlke toyatskat, vlēricet, heyv este hace hueran hēcet, em estemerketvn, momet en naorketvu oh vketecet, estofis Uehome esikatskvs, momet wiyiyatskvs; Este elecvtis komet, em penkvlet svpvklvks. Momof ece 'fvekvke tares.

"HACVLKE ESTOFVN HESAKETVMESE EM E TVLOFV ESCEHYEKOS."

CESVS VC VNOKECES.

1. CESVS vc vnokeces,
Cokv-rakkot cv kices;
Hopuetake enakets;
Yekevkekis, ent yekces.

Vc vnokeces,
Nakcokvt cv kices.

2. Cesvs vm elvtet os,
En cuko vn haukvren;
Holwvyeckvn vslecen,
'Mestucet eceyvres.

Vn vnokeces, &c.

3. Cv yekceko estomis,
Vc vnokece munkvts;
Hvlwen a vfvnnaket,
Vc vhecice munkvts.

Vc vnokeces, &c.

4. Ekvnnv ropottvyof,
Vc vpake munkvres;
Vnokecin omate,
Ca'lofvn cv'sepvres.

Vc vnokeces, &c.

ESTVKWVNAYV.

ESTVKWVNAYV kihocat cetto rvkrvke mahet omes.
En cvpke tat estele-vhopakv pale tutcene, pale ostat
oret omes. Heyv cetto rvkrakat, vkhvse sasan, mon-
kat uewv rvkrvke sasan fullet omes. Uewv vfopke



ehketv here punvttv vk hvtvpece uewv eske tayan ehket, peteteket likvntot, em vwole tetayen vlakof, oh tasket, e nokwvn em vpvllaket, nokcepelet, elecet omes. Monkat eto huere tis vcemket, oh wakkvntot, naket hoyanen hecof, e hvce eto vpvllvke emunken, a oh tasket, fekhonnicet omes. Efv tis, eco tis, monkat waktv o estomis nokmelet omes, mahoket omvnts ce.

Pum ekvnv estvkwnayv sekat epu 'fvcke taves. Hopuetakuce, hvtvm este hoporrenvkekat, Yvmv ekvnv fulles makaket, em penkvlvket omes.

ESTEMERKV SEKARES.

1. HVLWE mimvn mucv
Cesvs mekket likes;
Em estvlke afvckakat
Em vfolotakes.

'Stemerkv sekares,
'Stemerkv sekares,
Hvlwe vnokeckv 'sfvckan
'Stemerkv sekares.

2. Hvyayvhokuset,
Vhonkvtesko tay's;
Omvl' heren vyhikaket,
Cesvn vkvsamak's.
'Stemerkv sekares, &c.

3. Hesaketvmese
En Yvpefikuce
Kalfvle elehocvten
Vyvhikaket os.
'Stemerkv sekares, &c.

4. E catvn es nesat
E vpyyakket os,
Momekv eslopicuset
Vyvhikaket os.
'Stemerkv sekares, &c.

5. Puyvfekev Herat,
Vkvsvmkvn pu'mvs,
Celuslme Mucvsaten
Pumeu vpokyvren
'Stemerkv sekares, &c.

SATKV-TEKVPICV.

ELKV MEYKSV-SEKO.

SUMKETV.

TOTKV-RAKKO.

YOMUCKE.

OHTVHIKVKVTE.

ESTEMERKV YUKSV-SEKO.

ESTE-NEKRICV.

HESAKETV MEYKSV-SEKO.

HESAKVTE.

HVLWE-TVLOFV

HVYAYVKE.

HESAKETV YUKSV-SEKO.

AFVCKETV YUKSV-SEKO.

HESAKETVMESE.

Este vtekat heyv satkv wakkat em kvvpervn.

monkat em vkvskvnnv huere vlket omes. Momen mv huerat em onvpv opunvkv ocan em estet os.

Vn hessvlke toyatskat, heyv satkv wakkat em vpvhvmke estoman svpaklatske haks? Hericet ohonayet vketecvkes; opunvkv rvkrvke mahet os. Hvmkat Este-nekricv enakets, momet totkv-rakko este-merk v emeyuksv-sekan 'sayet os. Momen hvmket afvcketv emeyuksv-sekan, Hvlwe tvlofv Hesaketvmese likan er oret os.

Monkv hiyomat heyv satkv em vkvperv Este-nekricv em estet hueretsken omat, lvpken etohwv-lvpiket, Hesaketvmese em este hakvs. Este-nekricv vpake hueretv penkviket os, elkv meyuksv-sekan 'sestayet os. Momen sumketv make ocan hueret, mv satkv etohwvlpiket, Hvlwe-tvlofvn er oretvn ce yacet o haks? Hesaketvmese em este mvn vpakket hueretvn ce yacet o haks? Momen estomvyatet mv satkv etohwvlpakvye te? maketska? Cesvs eteropotiyet, etohwvlpkvransket os. Cesvs em e wkvranetsket os, ce feken e'mvranetsket os. Ceme cem vtotketv ce hesayehcekos. Ceme cem emekusvpkv, momet cen yvhiketv eteropotte mv satkv etohwvlpiketskekos. Momis Cesvs tvlkus, Cesvs tvlkusen em enhonret, emekusapetskof, emet ec evpahyet, mv satkv es ce tohwvlpkvres. Momof Hesaketvmese em este hakepet ece 'fveke tares. Cesvs em opunvkv hvmmaket os; "Estimvt vnen a vc oh aten omat, ossihcvkos." Monkv Cesvs oh vyvs. Momof hesaketv meyuksv-sekon, momet afvcketv meyuksv-sekon epoyetskvres. Satkv em vpvhvmke estoman hueretska?

FEKEPKV-NETTV

FEKEPKV-NETTV ehosekot vevyecvs; Hesaketvmese nettv epaken vtotke, vkhkopvvranevat pu'mvtes, momet nettv hvnken cvnakets makvtes. Heyvt Fekepkv-nettv tes. Pu tempunavat, heyn ce hohsvkates, maket omes.

Momekv estimv en nettv tate kerreyvrës, momet nake svrahkvn mellvte kerreyof, naken mv nettv ofv vfvstetv tate kerreyvres.

Hesaketvmese en nettv tes. Nettv omvkvvt Hesaketvmese enakets, Hayvtet omet, mvt etekvpakivtet omekv. Hvse nettvn ohfvnkvrane hayvtes, momet hvresse neren ohfvnkvrane hayvtes. Momis Hesaketvmese nettv epakat ymv ekvnv ohfvcev este emet omvtes. Momekv, "Nettv epaken vtotket, cena em vtotketv omvkvvn momecvs," makvtes.

Hesaketvmese makvtes, nettv hvnkat nake omvkv Hayvte rakke likat vrakkuehocvres. Heyvn makvтет omekv, Cehofv en nettvn kihocet omes.

Hesaketvmese nettv epakate ofvn ekvnv hayvtes, momet nettv eskolvpakan fekepvtes, momet omekv, Fekepkv-nettvn kihocet omes. Este tis, vpuekv tis, vtotkvte wiket, fekapet omes.

Mekusvpkv ohfvcev vkerricvranevat vrakhkvn, heyv nettv hayet omvtes. Fekepkv-nettv orof, este vtotkekot, fekhonnet, mekusvpkv tis vpehoyen heceyof, pum vkerrickv hvlwe fvcev vkwvapkët omes. Pu holwvyevket omen, pu feke holwahoketvt omekv, mv nettv vcaakatet oren, pum vkerrickv mvn oh

hecet omekaten omat, Hesaketvmese likat tis pu hose taves.

Cehofv en nettv tes. Heyv nettv hvte hvyatkof, Cesvs, elkv a en kvvvpiket, cvto-kofke osset omvtes. Momekv heyv nettv hvyayakof vtekat, pu Hesayecv vkerricet pum vkerrickv Hesaketvmesen kvvvpvke taves, momet Heyv nettv Cehofvt hayvtes, momekv mv ofv vfacket kvsvmares, makvraneyet os.

Fekepkv-nettv vcayecetv komēn omat, hvte hvyatkof, asvpaklet Hesaketvmese merretv em'pohvraneyet omes.

E vhericeyat, svheremahe nettv yvmahkvranēkot omes. Puna heren vtcecvraneyet omes. Momis pum puyvfekv mimvt hvsvtketv en heretv ofvn vtecvranet omes. Momekv heyv taten vkerricvrane-yet omes.

Fekepkv-nettv vcayeceyat, pum vkerrickvn heren vketecvranēyēs. Momet ymv ekvnv nake ocakat vkerricetvn e em vsehvranēyet omes.

Pum vtotketv nak vfvstetv svseceyvte omvlkv̄n wihket, mv nettv hvmkusat ofv, mekusapet, cokvn hecet, nake pum puyvfekv ohfvccv ocakat tvlkusen vkerricvranēyet omes.

Etewolen wvnen emekusapet, Hesaketvmese em Puyvfekv Vcakat epu'paket, pun horkvsvren vpo-hvranēyet omes. Momet este etv heyv nettv es en lopicvkven mekusapvranēyet omes.

Momeye tayan omat, mekusvpkv oh vp̄eyet, Hesaketvmese em vhakv heren em apohicvranēyet omes. Mekusapvlke vtekat pu feke vp̄ayet mekv̄s̄apet, yvhiketv kerrēn omat, yvhihokat, este mvni-cvranēyet omes.

Erkenvkv opunayat omvlkv heren em apohiev-raneyet omes. Holwvyeckvn en kvpvkvkes, maken omat, nake estomakan es holwvyeceye omen omat, heren vketecvraneyet omes, momet nake vfvstetv estomen wikeyvten omat, mvn kerreyof, momusen, "Hesaketvmese, naorkv toyvven, ve oh hehcet, vm merrvs," kievraneyet omes.

Hiyomen nettv yvmahiket omeysisem, nere fekepvraneyof, mekusapeyat, "Heyv nettv ofv naket pum matten omat, omvlkv pun kvpyecicvs Cesvs vrahkvn," kicet, mekusvvraneyet omes. "Opunvkv ot, vkerrickvt ot, fulletv tateu pum matten omat, omvlkv kvpicvs," kicet, mekusapeyet omes.

Hiyomen Hesaketvmese en nettv vcakat fullvraneyet omes. Momis estomahes! este nvcomuset hiyomat fullet omes, yvmv tvloftv on omat.

Este sulke mahet Hesaketvmese en nettv vcakat ehosaket, momekat kerrake estomis, holwvyecvket okv, mv nettv kvcaket omes. Momet Hesaketvmese em vhakv hvsatkusat kvcaket, em puyvfekev este merke taye ofvn e svpvklecaket omes, momen mv estemerkv ofvn vpeye munken omat, elkv yuksvsekon vpeye taves.

Mekusvkv-rakkon este fullisem, sulket opunkv fvccv-hakekon opunahoyet, ehvperkv nettv, Fekepkv-nettv yvmahkakat heceyet omes. Monkat heyv 'sem vheremahis sases. Emekusape 'syphokat tis naoricet omakes. Momis heyv este vkerrickv ocvkeko ome fullvte omvlkv psvtkvranet omes. Momet Hesaketvmese ehomv svpaklet ohfvccvranet omes. Momof, "Nettv-vcake hvtvm hymkuis oceyate," komkvres.

Totkv-rakko ofvn vpokof, "Aeha! estomen Hesaketvmese em estvlke tvkleceyvtes; momet en nettvu vyvmahkeyvtes; momēskate," makaket, este-merraket hvkihkhokvres.

Vn hesse, ceme hiyomat mv este toyetska? Aeha! momen omat, mucv vtekat Hesaketvmese en nettv tvklehcetskvs. Merkvu em apohicvs. Hofune mahekon, "Nettv sulke," Hesaketvmese, "cem merre, cem etektvnecvte estomet aretskvu haks?" ce kicet, cem'pohvres. Cem puyvfekv enrahkv sekat hesayecetske tayan, ce mehaktet omvret okv, heyvu kerrvranetsket os. Ce feket mucvse haket omekon omat, estomet heren Hesaketvmese em vhakv vfastet, en Nettv-vcakateu here vfvstetskeko tayas. Ce feket etv haket omen omat, Hesaketvmese em vhakv vtekat vfvstetv ece 'fvcke hakēs.

Momof Tewe mekko tate oket, "Cen cuko ofv nettv hvmkusis nettv cukpe rakko hvnken es en heres," maketskvres. Mv omat Fekepkv-nettv vkericetsket o haks?

Em vtotketv omvkvu em en heretsket ome haks? Momekat Nettv-vcakat cvpke mahet este naorices kometske haks? Ymvu ekvu Fekepkv-nettvu hiyome cem momen omat, Hesaketvmese 'me tvlofv liketv ce metetakekon omes. Estofis mekusvphoye munkvt omes. Fekepkv yuksv-sekot omes. Momis mv svhopakv ymvu ekvu nettv ohmerhoyvten vlosticetskekon omat, ce feke mucvsen ce yacen omes. Hesaketvmese tvlkuset heyv ce feke mucvset ce'me tayet omes. Em Puyvfekv Herat ec ohtoten, este mucvset ce haye tayas. Aeha! ce feken e'mvs. Cen holwvyeckv omvkvu wihket, Cesys cv Hesaye-

cv tes komet, oh vyvs. Momof yvmv ekvnv Hesa-
ketvmese em vtotketv ece 'fvcke tares, momvtet ot
Hvlwe-este sulkat vpaket, ece 'fvcket, vkvsvmkv
yuksv-sekon vyvhiketskvres.

Estvmv hopvye tis Nettv-cako omof vyetv tokot
omes, momet hvtvm cukoperice e afvcecicetv tokot
omes. Momekv mekusvpkv tis fulleyvten omat,
este vwahat momusen pu hutén vpeyvranevet omes.
Momet mekusvpkv vpeyen omat, mv tvlken vkerri-
cet, mekusvpkv rorihcet, fulleyvtet, mekusvpkv ro-
pottot, pu hutén fulecvranevet omes. Apuekv tis
hopohyekos, Nettv-cako omof, nake eten neseyvte
tis, nake etemfvccetv tis opunvyecvranevet omes.

Merkv vtotketvn vfvstvranevet omes. Este enok-
kan emvnicet, hvtvm este elat hopelet, hvtvm vpue-
kv tis elvranat emvnicetv omvranēs. Nake mome-
cvranevat tvlkuse ocakat heyvt mv tes.

“Fekepkv-nettv *cele en kvpyecicet*, vn nettv vca-
kate ofvn cem afvcketv hopoyetv cele en kvpyeci-
cetsken omat, momet Fekepkv-nettv este afvcecicat,
Cehofv enake vcaakat, vrakkat tes kicetsken omat,
momet Cehofv vrakkuecet, nake kometskat vfvstets-
kekon omat, momet cemet e afvcecicetskeket, cem
opunkv tis opunvyetskekon omat, Momof Cehofv
ofvn e afvcecicetskvres, momen ekvnv hvlhawan ec
oh licares, momet Cekvpe cerke enaken ce hompi-
cares, Cehofv e cukwvt opunvyvtet omekv.” Es.
58:13, 14.

“Momen vm etohnkvftetv vtekat em ofvn vm
vhakv momet vm opunkvu vcayecvkvres. Momet
Fekepkv-nettvu vrakkuecvkvres.” Ezk. 44:24.



VHAUKEN VKHOTTVS.

Erwv toyetskat, vhauke nvkhottvs ce kivyof, cvpvkke here ont a hehcetskvs. Hotalan, Pucat tayen etkolen okis. Ce hesake vtekat vhauke vkhottetske munkv taranat tvlkekv, hiyometan eskerretskan heres.

Estoman oketska? Cokv-heckvn ayit, nakcokvn keriyit, vhakv-hayv hakvranvyet omes. Momvranvtet mometsken omat, vhauke sulken vkhottet estehununwv here haketskvres. Vhauke estomakaten oketskat vm onvyvs, Puca toyetskat. Momat hofunusekon liketsken, estomën okvyat cem onvyares.

Enhvteceskv ce hvckot vhaukets. Mvn nake ker-rvkekat pohekaren vkhottvranetsket os. Opunvkv hervkekis, cepvnvke es ce tempunayis, momen este mvnettvkke tis nake herekis ce mvhayake wites; mv omakat pohekaren, vkhottvranetsket os. Mvn momecetskekon, ce hvckohauke esceyen omat, Etwv, este vhakv-hayv hakvranvte en heren, ayeko taye hahke wites. Momen ce turwv en hauen hvtvm vkhottvranetsket os. Nakcokv hervkekat tis, mo-

men nakcokv-tvleme holwahokis hecetsken omat, ece hopvne tayekv, mv omvlkvt hecekaren 'mikhottet herakat tvlken eshecvranetskes. Momen nake herakuse omvke neskv-cukofv nake wiyetv tis oces: mv omakan hecekaren vkhottvs. Mvn momecetskekon omat, cvtokunawv vcayecetv kerrekot, estimvn em merretskeko tayvres.

Ce cukhvrpe 'mvhauke haket vkhotkvrnat tvlkuset os. Mvt ce tulaswv nake hervkeko 'sopunvyvrana 'semikhottet omekv. Mvn vketece heret ometskvres, mecetskekon omat, opunkv holwahoke cvpvkhome tis sossices. Monk vketecet, hoporrenkv herakan vteloget sulecetskof, nake herakate min sossicetskvres.

Ce feke ofv vhauken nake ece'nrapat asceyekaren vkhottvranskes, cem vkerrickv ce feke ofv opunaye ocat vhacke cem vhecuvts, momis mv cem onayan em apohicetskekon omat, nake cem onayvte wikepen ce'stemerike wites.

Monkv vhericet ce hvcko, momen ce turwv, momen ce cukhvrpe vhauken vkhothuecetsket on omat, naorketv moskometskeko es ce ceye ce'stemerrice tayate sulken 'mikhottetske taves.

Momekv vhaue vkhottetv nake vfvstkvre tetaget os. Yvmv ekvnv aretskis, nake cen hervket omes; momen emeyuksv-sekat ofv cen hervren kometsken omat, yvn momecvransket os.

VKTOPV.

HEYV nake ocat vktopv tes. Hvccet tikesko tayet omen, vktopvn hayet omhos. Mv vktopvn oh



huyiret tiketvt os. Eto, tis cvto tis vktopv es hahoyet os. Momis hvce hvmtat ocet os, momen este estomet mvtan, vktopvn hayet, tikeko tayet os. Elkv en hvccet mv tes. Momis Cesvs pum vnice, mv hvce tiyeceyes. Mvn em e wikēt, em enhonrēn omat, elkv en hvce yomuckat roriceyof, mvt epu yvpayet es pu tikvres. • Momet mv elkv en hvce es pu tikof er tvpalv ekvnv here mahan 'se pu'yvres, momen mvn vpaket estofis epu 'fvcke tares.

PU FVCKET ETEHECES.

Pu fvcket, epu 'facket
 Heyvmvn etehecēs.
 'Rolope hoyanadet
 Nettv heran 'svlakes.
 Heyv afvcketv nettvn
 Epu 'facket heces.

Cehofvn vkvsvmvks,
 Pun hesaketvn pu'mes;
 Nake pu 'fvceccicat
 Nettv omvlkvn pu'mes.
 Heyv, etc.

Pu 'facket etehecēs,
 Cesvs, epu'nakuecvs,
 Pum afvcketv omvl'
 Ece 'fvceccicate!
 Heyv, etc.

Purkvlkeu, mvhayvlkeu,
 Pun hessvlke tohkvlen
 Muev pu 'facket heces,
 Monk vvhikēt okēs.
 Heyv, etc.

Monk' pu Hayvten hvttm
 Heren vkvsvmvkes;
 Pu nesvren Eppuce
 Hvmkusat atotvtes.
 Heyv, etc.

En 'Yvfekev Vcakan
 Em 'poheyet on omat,
 Mvn a pun 'totepyres,
 Monkv vkvsvmvkers;
 Heyv, etc.

TEWE WENSLETT.

HECATSKES, Tewe Wenslett e hocefkv̄t vliket os, heyv nakcokv̄ enhvteceskv̄n. Mv̄ este heren vkerri-catske tayat ce sasvkēs, momet heyv e hocefkv̄n hecatskat, este hēret omvten kerratskes.

Momis este sulket heyv este kerrvkv̄te sekok heyv nakcokv̄n hecvkv̄res, komis. Mv̄ esvrahkv̄n opunvyecvr̄anis. Mv̄ este mv̄nettof, Mv̄skokv̄lke hopuetake sulket cokv̄-heckv̄ hiyome em etektv̄n-kat omekot omvtes. Kawetv̄ mv̄hakov-cukon likof, nakcokv̄ kerretv̄n eyacuset on hecat, mv̄hayv̄lket, yafke, vtotketv̄ en hoyanof, mv̄hayaken, kerretv̄n vliceepvtes. Heyv 'remohyupv̄, hopuetake oceh-pofv̄t, em etvlwv̄ mv̄hayetv̄ eyacat, Tvlv̄hasse mv̄hakov-cukon vnakuecuset liket, 'sten kerrepet likvtet os. Momet este-hunvnwv̄ orepet ont, momet em erkenvkv̄, Laklec kicetv̄, en yvteket o' estomis, hopuetake cokv̄ hecat vpake hecetv̄ es e yatuecekot omvtes. Momet hvtvm̄ here kerre mahat mv̄hayv̄ Lapv̄se tepaket. "Mv̄skoke en Nakcokv̄ es Kerretv̄ Enhvteceskv̄" tohtvlhuecakof, mv̄hayv̄ etvt nakcokv̄ Klamv̄ kicetv̄n emv̄hayen, heren er kerre mahet omvtes.

Heyvn̄ ce kievkis, estī țoyatsket, estvmvn̄ hue-

ratske estomis, ce mvnettet ot, ece'culet o estomis, heyv este arvte omet, kerretvn vcevllatske munkv-res, komit okis.

Hoporrenkv vrakkuecet omekv, estofis este vpv-lwv 'sem vcahnet, 'sem vnicetv eyace emunkvt omv-tes. En helpket o estomis, cokv-heckv ocat vfek-hounet, em apohicet, momet em vcahnet omvtes. Heyvn mv omvkes.

Este vnokecat omecicen, lypken nakcokv en hec-kvkepvren komet, vnickv es naorekatet omes. Nettv vrahkv Laklec emvnicen cokv tohtvllhuecen en ho-yanof, vpvltake cokv lopuckuce hayetv emvnicet omvtes.

Vhvmkv, cokv "Cesvs a oh vtes" semvwetene-puehocvren tetakuecetvn pu yacet ofvn, yeceyvntvs, mohmet "Rvro em vkwikvn cv kihocen, 'Vc vcvkv-peyatsken, este em vkwiylvken ce hayvkares' Cesvs makvten vkerrievyis," makvntvs, momet pu mvni-cvntvs.

Erkenake 'mapohicakat, Cesvs vnokeckv, momet este vnokeckvu e feke fäckuset omen, hecaktet omes. Turopuswv e turwv fäckusen, Cesvs em este-merkvt e onayet, "Cesvs vnokecepvks," makvtet omes. Em vretv omvkvte este vnokece tat kerkue-cet omvtes, momen este vnrapv nvcome mahat tates, komvyet omis. Moman erkenkv Pvkvn ële oh erkenakof, hesake huerof, este vnrapv oceko mahat omvtes, makvtet omes.

Pucase en huehkvranat em etetake taret kome munkvt omvtes. Hvyakpon etehoyanet aret, este tvk elehocvtet omen vkerriecet, vyecicet, yvhiketv 161 tetakuecet, e hute er ohret, cokv es hayvtet omes.

'Renyupvn opunvkv Cokv-Rakko asossen yvhiketv
160 coyvtet omes.

Monkv, espoke enokkof, Vlekv Heckak heevtet,
"Em eyuksv mahlvptketvt omvnks," maket cokv
pum atotvtet omes.

Monkv mv omatskvren ce kievkvyet omes.

Hoporrenkv hopokv mv omatsvres.

Heyv cem onvyvkvyat omvlkvn mv omatskvres.

Este emvnickv mv omatskvres.

Cesvs vnokecetv uv omatskvres.

Este omvlkv vnokecetv, momet Cesvs 'soh ayetv
kometv mv omatskvres.

"Pucaset cen huehkes" mahokof, vm etetake
tares, komet, estofis vketece huervte omatskvres, ce
kievkit 'respoyis.

Kvco-hvse nettv 17, ohrolope 1862 ofvn, yvmv
ekvnnv en kvpahket, fekvpkv Pucase 'metetakuecv-
ten eceyepvtet omes.

"Este-facev em elkvn cv'lekvs, momen vm eyuk-
svt mv enake omekvs."

HVYATKOF TEHECEYVRES.

HVLWE mimvn hvvatkof teheceyvres,

Monkv ce 'fackvkekvs;

Afvcketv emeyuksv sekaten

Ahonec'yvres.

Mvn vhauke 'stofis vkhotkekares;

Mvn hesaketv etot huerepes;

Mvn hesahokvte vpokes;

Mvt pu hute tares.


Hvlwe mimvn hvyatkof teheceyvres,
 Monk ce 'fackvkekvs.
 Hecvks! oketvt pvfne hoyvnepet os,
 Teheceyvres.
 Mvn vhauke, etc.

Hvlwe mimvn hvyatkof teheceyvres,
 Monk ce 'fackvkekvs;
 Pun hessvlke pu homvn vpeyvtet
 Pu 'mehaket os.
 Mvn vhauke, etc.


Hvlwe mimvn hvyatkof teheceyvres,
 Monk ce 'fackvkekvs;
 Enokketv, estemerkvu sekars;
 Fekvpeyvres.
 Mvn vhauke, etc.

Hvlwe mimvn hvyatkof teheceyvres,
 Monk ce 'fackvkekvs.
 Cesvs pu Nesv vpake toveyvres
 Meyuksv-sekan.
 Mvn vhauke, etc.











SMITHSONIAN INSTITUTION LIBRARIES



3 9088 00767 0672